

MOKAMBI



Nkolo apambola yo, Ndeko Neville.

Nazali na esengo mingi kozala lisusu kati na losambo na mpokwa oyo. Mongongo na ngai ebebi mwa moke. Ezalaki Liteya moko molai na ntongo oyo, pe nazali mpenza na esengo ndenge tozuaki Yango. Ngai moko pe nasepelaki na Yango, ntango nateyaki Yango, pe nazali kolikia ete bosepelaki koyoka Yango. [Losambo balobi: “Amen.”—N.D.E.]

² Sikawa bobosana te, bokanisaka likambo oyo ntango nyonso, makambo oyo nde etongaka mosali na Klisto. Bomoni, liboso kondima, na nsima nguya. Pe sikawa bobosana te, Molimo Mosantu akoki koya likolo na ndako na Nzambe te, bobele soki makambo yango ezali kosala na nzela ya Molimo. Ata bozali kosala nini, bomoni. Makambo oyo nde etongaka Nzoto na Klisto, bomoni, makambo wana. Sikawa, bobosana yango te, likambo ya liboso yango *oyo*, ezali kondima na yo. Nguya, boyebi, pe bongo na bongo, esengeli kobakisama likolo na yango, kino epimelo mobimba ya Klisto ekomonisama, na ntango wana nde Molimo Mosantu akokita likolo na yango pe akotia elembo mpo na kosala Nzoto moko. Makambo oyo esengeli kozala. Yango wana Yesu alobaki: “Bokoyeba bango na mbuma na bango.” Bomoni, mbuma! Bokoki kobota mbuma te kozanga makambo oyo ebotisaka mbuma kati na yo. Na bongo, ntango makambo oyo ezui esika ya makambo ya mokili pe—pe ya kozanga kosambela, pe nyonso, pe kozanga kondima nyonso elongwe, bongo makambo nyonso ya mokili elongwe, na ntango wana eloko mosusu ekotikala te bobele ekelamu ya sika kati na Klisto. Pe na bongo, Baefese 4:30 elobi: “Boyokisa Molimo Mosantu na Nzambe mawa te, botiami elembo kati na ye mpo na mokolo na bino ya lisiko.” Botiami elembo kati na Bokonzi na Nzambe! Sikawa, bobosana yango te. Bosimba yango malamumu sikawa, esengeli liboso makambo *wana* ezala. Na nsima, kotiyama elembo ezali Molimo Mosantu, Eloko oyo ekotia biso elembo kati na Nzoto. Malamumu.

³ Tozali na—na lilombo moko sikawa, ya Ndeko mwasi Little, ya Chicago, mobali na ye azuaki likama ya motuka, pe azali kobunda na liwa, Ndeko mwasi Little. Pe Edith Wright, ndeko na biso ya mwasi ya moke oyo toyebi ye uta kala, azali kobela makasi mingi mpenza, na ndako na ye na mpokwa oyo, pe balingaki likambo yango élobama na losambo, mpo biso nyonso tókoka kobondela elongo mpo na lilombo yango. Pe sikawa tógumba móto na ntango moke.

⁴ Molingami na biso Tata na Likolo, tosangani pene (na kondima) na Ngwende na Nzambe, pe tozali kosenga mawa na

Nzambe mpo na malombo oyo. Ndeko mobali Little, likama ya motuka, azali kobunda na liwa. E Nzambe sunga ye. Tika ete Molimo Mosantu ázala na motó ya mbeto na ye, pe Azongisela biso ye, Nkolo. Pe elenge mwasi Edith Wright azali kuna, nazali kobondela, e Nzambe, ete Molimo Mosantu ázala pembeni na mbeto na ye na mpokwa oyo, pe Azongisela ye bokolongono ya nzoto. Kokisa yango, Tata. Yo olakaki makambo oyo, pe biso tondimi yango. Ndenge tozalaki kokanisa likambo yango na ntongo oyo, ntaka ezali na ntina te mpo na Yo, Ozali mpenza monene na eteni moko ya mokili ndenge Ozali na eteni mosusu, mpo ete Ozali bisika nyonso, na nguya nyonso, na suka te. Pe tozali kobondela Yo, Tata, Okokisa malombo oyo na Nkombo na Yesu Klisto. Amen.

⁵ Nazali na esengo mingi kozala lisusu awa na mpokwa oyo, mpo na . . . Nayebi molunge ezali makasi. Tosali mayangani misato oyo elandani, pe ezali. . . Nayebi bato mosusu kati na bino bakosala ata mile nkama mitano [800 kilometele—N.D.T.] kotambola na motuka, banda sikawa kino lobi na ntongo. Pe na nsima na nzanga ya lobi, ngai nakosala mile nkoto moko na nkama minei na motuka, na nsima awa. Bongo, bongo na—nazali kolikia ete bino nyonso boleki ntango malamumu. Pe ngai, nalekisi ntango malamumu kosolola na bino. Likambo bobele moko tozalaki kosenga, mpo esengeli tozongisa bato mingi mpo bisika ezali te, tokoki kotondisa bato meke na kati te, kompani ya koboma móto bakondima bongo te. Bongo, tozali koluka sikawa kozua losambo oyo ezali mwa monene koleka, mpo ntango tokozala kuna, tokoka kozua bisika ekoki mpo na kofandisa bato.

⁶ Pe sikawa, na ntango nyonso, tokoyamba bino ntango nyonso malamumu awa na losambo, epai wapi tozali na endimeli mosusu te bobele Klisto, mobeko mosusu te bobele bolingo, buku mosusu te bobele Biblia. Pe na bongo. . . Pe mokengeli na biso awa, ezali nde Ndeko Orman Neville. Pe koyangana oyo tozali na yango awa, ezali—ezali bato mingi oyo bazali kosangana na losambo oyo eyambaka moto nyonso, bozali koya kosambela Nzambe awa, kokokana na mposa pe lisosoli ya mitema na bino. Tozali ntango nyonso na esengo kozala na bino. Na bongo, bokoki koya ntango nyonso bokokoka, tokosepela ntango nyonso koyamba bino.

⁷ Pe sikawa, ndenge nayebi, mbala na nsima oyo nakozala elongo na bino, ekozala soki mosala ya kotonga ndakonzambe esili. Pe na ntango wana, nalingi, nsima na *Bileko na Lingomba*, na bongo tolingi koleka na *Bilembo* nsambo ya suka, pe, *Bilembo* nsambo ya suka kati na Buku ya Emoniseli, koteya malakisi likolo na Yango.

⁸ Pe na bongo, mbala mingi bato na bokono pe bato na mawa bayaka, pe, na ntango ya mayangani yango, esengaka na bimononeli, pe bato bayaka mpo na masolo ya moto na moto. Soki nakoti na makambo wana, na nsima na—nakoyeba lisusu

kosala bokeseni kati na yango te, pe, te, ezali mpasi mpo na ngai koteya nsima na yango. Pe moto nyonso ayebi ete na bakampanye na biso ya lobiko na nzoto, na momesano M. Baxter to moto mosusu nde ateyaka, bongo ngai nabimaka kobondela mpo na bato na bokono, mpo elembisaka mingi mpenza. Nabondelaki mpo na bato eleki ntango moke, nakutanaki pe na mwana moko ya moke kuna, oyo minganga . . . azalaki na eloko moko na mokongo, abotamaki na yango. Ntango nabimaki, namonaki ye afandi wana na simán. Mwana yango akotikala ebosono bongo soki moke te, akobika. Na ntembe te, akobika, bomoni. Oyo wana, nayebi yango. Bomoni, nayebi yango malamumu. Na bongo, tolingi kozala na kondima pe tondimela Nzambe.

⁹ Moko na moko kati na bino, pe mingi kati na bino nayebi bango te, batei nyonso pe bamosusu. Soki namikosi te, oyo, ezali Ndeko Crase. Boye te? Ndeko Crase, nasengeli kosenga yo bolimbisi, ndenge nakendeki te na bobulisami ya losambo. Ntango mosusu nakokende kuna mpo na liyangani ya suka ya póso, ekozala pe malamumu. Boye te? Kuna na Bloomington. Bozali malamumu? Malamumu. Bandeko mosusu awa bazali batei, nakanisi. Bozali batei? Iyo, misie. Nkolo apambola bino. Pe batei bazali boni na kati na losambo oyo, botombola maboko. Ee, oyo ezali malamumu mpenza. Tozali na esengo kozala na bino awa, esengo mingi. Nzambe apambola bino ntango nyonso!

¹⁰ Bongo, mpo ete tokoka kobima na ntango malamumu, bamosusu bakokende na Georgie, na Tennessee, na New York, bipai na bipai, na mpokwa oyo, bakozonga na mpokwa oyo. Sikawa, botambwisa mituka na bokebi. Soki óyoki mpongi, pe óboi kolala na motel, tia motuka na yo pembeni na nzela pe ólala kino. . . Ngai nasalaka bongo. Omoni, tia motuka pembeni pe ólala. Te, kotambwisa motuka ntango ózali kolala te. Ezali malamumu te. Pe, bobosana te, ezali mpo na yo te, esengeli kosenzela moto oyo azali kolanda yo. Bomoni? Yo oyebi esika ozali kokende, óyebi esika ye azali kokende te, bongo—bongo ósengeli kosenzela moto wana. Na bongo, zala mpenza na bokengi ntango nyonso, mpo na kosenzela yango.

¹¹ Sikawa, nalingi kotanga na mpokwa oyo, eteni moko ya Makomi oyo ezuami na Buku ya Yoane. Bongo, milongo na Makomi oyo tokotanga pe tokolobela, ezali mpo na kopesa biso moboko na oyo tolingi koloba. Pe na ntango nyonso, ngai, ata mbala moko te, ndenge nazali kokanisa, namataka na eteyelo te, mpo na komeka koloba makambo bobele mpo na koloba. Nasalaka makasi ntango nyonso kozela, kosenzela, koyekola, kobondela, kino nakokambama kozua eloko moko oyo ekosunga bato. Soki nakoki kosunga bato te, bongo ezali na ntina te kotelema awa, bomoni. Ezali mpo na komeka kosunga! Pe sikawa, na mpokwa oyo, na ntembe te, bato mingi kati na biso bazongi na ntongo oyo, pe, esengelaki ete bazonga, mingi kati na bango. Kasi, na mpokwa oyo, nayebisaki bino ete soki bokei te,

tokomeka kosolola bobele miniti ntuku minei na mitano likolo na likambo moko, oyo nazali kolikia ete ekosunga biso. Pe mpo na kopesa yango moboko, sikawa, tokamata Yoane, mokapo ya 16, pe tobanda na nzela ya—ya 7 na mokapo ya 16, pe totanga kino na—na nzela ya 15.

Nde nazali koloba na bino ya solo: eleki malamumu mpo na bino ete nakende, mpamba te soki nakei te, Mosungi akoyela bino te. Kasi soki nakokende, nakotinda ye epai na bino.

Ntango akoya, akopamela bamokili na ntina na masumu pe na ntina na boyengebene pe na ntina na kosambisama.

Na ntina na masumu, mpo ete bandimi ngai te;

Na ntina na boyengebene, mpo ete nakokende epai na Tata pe bino bokomona lisusu ngai te;

Na ntina na kosambisama, mpo ete mokóló na mokili oyo asili kosambisama.

Ngai nazali na makambo mingi ya koloba na bino nde bokoki koyamba yango sasaipi te.

Nde ekoya ye, Molimo na solo, akokamba bino kati na solo nyonso; mpo ete akosakola mpo na ye moko te kasi akosakola yango ekoyoka ye, pe akoyebisa bino makambo oyo ekoya.

Mpo akokumisa ngai mpo ete akozua makambo nyonso epai na ngai pe akoyebisa bino yango.

Nyonso oyo Tata azali—azali na yango, ezali pe ya ngai. Yango wana nalobi ete akozua yango ezali na ngai pe akoyebisa bino yango.

¹² Sikawa, na nzela ya 13, awa. “Nde ekoya Molimo na Solo, Akokamba bino kati na Solo nyonso. Ntango Molimo na Solo akoya, Akokamba bino kati na Solo nyonso.” Solo ezali nini? Liloba. “Mpo ete Akosakola, Akosakola mpo na Ye moko te; kasi Akosakola yango ekoyoka Ye. Akosakola yango ekoyoka Ye.” Na elobeli mosusu, Ye nde Akomonisa likambo yango, bomoni. Pe na mokapo ya 4 ya Baebele, Biblia elobi ete “Liloba na Nzambe ezali mopótu koleka, na nguya koleka mopanga mopeli bipai mibale, pe—pe Esosolaka makanisi pe mikano ya motema.” Bomoni: “Makambo oyo Akoyoka, Akosakola yango, pe Akoyebisa bino makambo ekoya.” Bomoni? Eloko nini ekosala yango? Molimo Mosantu Oyo akoya na Nkombo na Nkolo Yesu.

¹³ Pe nalingi kozua miniti moke ekolanda mpo na kobenda bokebi na bino likolo na liloba “kokamba,” *Mokambi*. Boyebi, nabikela makambo mingi na zamba. Mokambi, moto mpo na kolakisa yo nzela. Osengeli kozala na mokambi soki oyebi esika ozali kokende te. Pe lokola namesana kosala bokila, pe na mokili mobimba, nazua li—libaku ya kokutana na bakambi. Pe

ngai moko nazali mokambi, na Colorado; mpamba te nayebi etuka yango, ezalaki mosala na ngai, pe nyonso, nakoki kozala mokambi na Colorado.

¹⁴ Bongo, mokambi asengeli koyeba nzela. Asengeli koyeba esika azali kokende pe eloko azali kosala, pe lolenge ya kobatela yo na nzela. Bomoni? Asengeli kosenzela ete óbunga te. Mokambi, azali moto oyo aponami. Ekólo nde eponaka moto yango, soki azali mokambi. Pe sikawa, ntango okei kotambola na zamba, epai wapi ntango mosusu omesana kokende te, ezali malamau te ókende yo moko, kozanga mokambi. Ya solo, bisika mosusu ezali oyo ókoki kokende yo moko te kozanga mokambi, ndakisa, na Canada. E—esengeli ete mokambi atia loboko na mokanda na yo ya nzela, liboso ya mobateli ya zamba. Asengeli kokoma nkombo na ye, ete azali na mokumba ya bomoi na yo. Soki likambo moko ekómeli yo, ezali na motó na ye. Asengeli kobatela yo. Asengeli kosenzela ete óbunga te. Asengeli na malamau mpenza kotinda yo esika oyo ókobunga nzela ya kozonga te. Pe soki óbungu, asengeli koyeba etuka yango malamau mpenza ete akoki kokende kozua yo na ntango nyonso. Asengeli koyeba makambo nyonso wana, soki te akoki kozala mokambi te, akoki kozua mokanda ya kozala mokambi te.

¹⁵ Mpo na makambo ya boye, mbala mingi esengelaka kózua elaka ya bokutani, kóbenga liboso pe kómilengela, kóbombisa esika, mpo moto akende kotika yo. Pe soki. . . Ntango mosusu, manaka na ye etondi, akoki kokende kotika yo te, esengeli kózongisa yango moke na nsima, mpo na—mpo na mokambi ya mokili oyo. Osengeli kosala yango soki moke te mpo na Mokambi ya Nzambe, Abelemaka ngwi ntango nyonso, abelemaka ntango nyonso.

¹⁶ Sikawa, soki olengeli makambo oyo liboso te, pe ozwi mokano ya kokende na zamba oyo ókóma naino liboso te, ókoki kobunga, pe kókufa. Ozali na konzo pene na moko likolo na mokama ya kobima na zamba yango, elingi koloba, soki ezali zamba monene te, okoki kozala na konzo moko likolo na mokama ya kobima yo moko. Kasi soki ezali zamba moko monene mpenza, ya mosika mingi, ózali ata na konzo ya kobima te. Nzela ata moko ya kobima ezali te, mpo ete ókomona ózali kotambola na nzela ya liwa, pe na ntango yango o—ozangi elikia, na ntango yango esili mpo na yo. Bongo, pe okokufa, soki ozangi mokambi oyo ayebi etuka yango pe ayebi ndenge ya kozonga.

¹⁷ Mingi kati na bino bayebi likambo oyo ekomamaki na zulunále mbula eleki, kuna na Tucson, na Arizona, bilenge wana ya Scout. Nzoka nde, bayekolaka lolenge ya komibatela, bazalaki ba-Scout. Pe bazalaki ba-Scout ya balikili te, bazalaki mpenza ba-Scout. Pe bamataki likolo na bangomba, pe ekumbaki ya matandala ebandaki, likolo ebongwanaki. Pe babungaki kuna pe bango nyonso bakufaki, ezali mpo ete bango. . . likambo moko, mbongwana esalemaki kokesana na

ndenge makambo ezalaka, bayebaki lisusu te lolenge ya kosala. Bomoni? Pe nabosani motango ya bilenge oyo bakufaki na ngomba, ata batindaki ba-hélicoptère, ná bapolisi, ná Bakengeli ya Mboka, ná bato ya motema malamumu oyo bandimaki kokende, pe nyonso wana. Kasi babungaki, moto moko te ayebaki esika bazalaki. Pe bango moko bakokaki komibatela te. Bango nyonso bakufaki na matandala, mpo bayebaki te soki bazalaki kokende na ésti, na nórdi, na wésti to na súdi, soki bazalaki komata to kokita, ata eloko moko te, ngambo nyonso ezalaki ndenge moko.

¹⁸ Kasi, mokambi ayebi esika azali, ata likolo ekómi ndenge nini. Ye azali—azali na oyo esengeli mpo na yango. Ayebi eloko azali kosala. Amesani na makambo nyonso. Ayebi lolenge ya makambo nyonso, na bongo akoki kofanda kati ya molili, pe akoki koyeba eloko oyo asimbi.

¹⁹ Ndakisa, tala boyebi ya kala mpo na mokambi. Boyebi, soki okoki kotala minzoto, moto akoki koyeba ngambo nini azali kokende, soki azali kotala minzoto. Pe osengeli ntango nyonso kotala bobele monzoto ya solosolo. Monzoto ya solosolo ezali bobele moko, ezali nde Monzoto ya nórdi. Bomoni, bobele moko, yango etelemaka esika moko. Ezali kotalisa Klisto, ndenge moko lobi, lelo, pe libela. Oyo mosusu ekoki kotangwa na nzela, kasi Ye, Abongwanaka te. Mangomba ekoki komema yo na nzela *oyo*, to komema yo na nzela *oyo kuna*; kasi Ye te, Azali bobele ndenge moko.

²⁰ Ee, sikawa, soki okoki komona Monzoto ya nórdi te, pe mapata etondi, na ntango wana, okotala, soki ntango etani pe obungi, ekosenga otala banzete. Nzete ezalaka ntango nyonso, matiti mike-mike na yango ezalaka na ngambo ya nórdi, mpo ete ngambo ya súdi ya nzete ezuaka moi mingi koleka ngambo ya nórdi. Kasi soki butu eyindi pe okoki komona matiti yango te, okosala nini? Soki okangi miso, pe okanisi eloko moko te, okangi miso pe oluki nzete oyo mposo ezali sembe-sembe, tia maboko na yo zongazonga na nzete yango kino misapi na yo ekutana, pe na nsima, banda kotambola malembe-malembe zongazonga na nzete yango. Pe ntango okokóma na esika oyo mposo yango ezali mpenza makasi, na pota, ngambo ya nórdi yango wana (mopepe), pe ókoki koyeba ngambo nini okokende, na nórdi to na súdi. Pe na bongo, oh, makambo ezali mingi, kasi esengeli bakamba yo mpo na koyeba kosala makambo yango. Moto moko akoki kotelema pe koloba: “Mpo na ngai, ndenge nasimbi, bokeseni ezali te.” Bomoni? Bomoni, esengeli balakisa yo mosala wana ya kokamba.

²¹ Pe bilenge mibali oyo, na ntembe te bazalaki ba-scout ya solosolo, ntango mosusu bakokaki koyeba kokanga miswalé, ntango mosusu bakokaki koyeba kopelisa motó na mabanga, pe bongo na bongo. Kasi koyeba nzela ya kozonga, yango nde mama na likambo! Bango, bayebaki nzela ya kozonga te, pe na bongo,

bango nyonso bakufaki, mpo ete bazuaki mokambi elongo na bango te.

²² Tata moko azangaki bokebi, eleki mbula mibale, na Colorado, oh, alingaki kokende na bangomba, azalaki na elenge mobali ya mbula pene motoba to nsambo. Alingaki komema ye na bokila ya nganzi mpo na mbala ya liboso. Bongo, bakendeki likolo na ngomba, pe elenge mobali ayebisaki papa na ye: “Nalembi.”

²³ “Mata na mokongo na ngai. Naino tokómi likolo mingi te, banganzi bazalaka na bisika ya likolo.” Pe mobali yango atamboli, atamboli, atamboli, kino akómaki . . . Ayebaki te, azalaki moto ya engumba. Ayebaki ata ndenge basalaka bokila to esika ya kokende te. Moto nyonso oyo ayebi makambo ya zamba moke ayebi ete ba-nganzi bafandaka na bisika ya likolo te. Bamataka kuna likolo te. Bantaba nde bafandaka kuna na likolo, kasi ba-nganzi te. Bango bazalaka na nse, epai wapi bakoki kolia, esengeli bafanda esika bilei ezali. Pe na bongo, kasi mobali yango azalaki komilobela: “Soki namati likolo mingi, na mabanga, kuna na likolo, nakozua nyama mobali ya monene.” Amonáká fótico ya nganzi moko ateleme likolo na—ateleme likolo na libanga, pe azalaki kokanisa akokuta yango kuna. Kolanda makambo bazulunále wana ezali koloba te, hólála, lála, ókolota ndoto ya mabe! Ezali, likambo ya kosala ezali bobele moko, zala na mokambi mpo óyeba esika ozali.

²⁴ Pe tata yango, mbala moko mbula ebandi kobeta kuna na likolo, moko na mbula ya makasi oyo ebetaka mbalakaka. Pe mobali yango asalaki bokila ngonga esili koleka, kino butu eyindaki pe akokaki lisusu komona nzela ya kozonga te. Pe mo . . . na nsima mopepe eutaki likolo na bangomba, bongo ye azalaki kotambola nokinoki, pe esa . . .

²⁵ Esengeli koyeba komibatela na bomoi, soki kokoso ekómeli yo kuna. Likambo mosusu yango oyo, koyeba komibatela na bomoi! Nasila komata na banzete pe koselumoa na nse, komata na banzete pe koselumoa na nse, komata pe kokita ndenge wana, mpo nakufa te. Nazalaki kozua matandala ntango ekómaki na mosanda ya minei [1,22 m—N.D.T.] ngambo na ngambo, nazalaki kopasola ntina ya nzete pe kotia yango na nse. Pe nazalaki na nzala makasi kino nakokaki koyika mpiko te! Pe nazalaki kopasola ntina ya banzete ya kala, nazalaki kopelisa yango, pe móto ezalaki konyangwisa matandala. Na nsima, pene na ngonga ya yambo to ya mibale na ntongo, nazalaki kolongola ntina ya banzete yango, pe nazalaki komilalisa na mabele wana ya motó, mpo nakufa te. Pe ósengeli koyeba kosala makambo oyo.

²⁶ Pe mobali yango ayebaki eloko azalaki kosala te, azangaki moto mpo na kokamba ye. Pe amemaki mwana na ye moko ya moke na ntolo na ye, kino ayokaki nzoto na ye kokoma malili pe kokufa. Kozanga bokebi! Soki azuaki mokambi akende elongo

na ye, ye akokaki komema ye noki na nse na ngomba, ata na ngonga nini, bomoni. Kasi, azelaki kino molili eyaki, na ntango wana akokaki lisusu komona nzela te.

²⁷ Yango nde likambo ya Baklisto ya lelo. Bazali kozela kino butu eyinda, ntango wana okomona ete okei yo moko pe Mokambi atikali. Mokambi!

²⁸ Ee, bosila komona moto oyo abungi? Moto moko awa asila kozongisa moto oyo abungi? Ezali likambo ya mawa koleka oyo bomona naino te. Soki moto abungi, akokóma lokola moto ya liboma. Akoyeba lisusu makambo oyo azali kosala te. Tozuaki mobali moko kuna, elenge mobali, abungaki na zamba, pe azalaki kokanisa. . . Azalaki mosali na elanga, kasi azalaki na mabele na ye te pe abungaki, ayebaki lisusu nzela ya kozonga te. Bongo ntango bazuaki ye nsima na mikolo misato, azalaki kokima mbangu lokola moto ya liboma, azalaki kogánga na makasi na ye nyonso. Mbebo na ye nyonso epasukaki, abwakaki bondóki na ye pe ayebaki lisusu eloko ya kosala te. Pe ntango ndeko na ye moko, ntango. . . Esengelaki ete bakanga ye pe batia ye nsinga. Ntango ndeko na ye moko ayaki pembeni na ye, apumbwaki likolo na ye lokola nyama, alingaki koswa ye mino, azalaki komiyeba te. Mpo na nini? Abungaki. Pe soki moto abungi, akokóma lokola zoba. Pe akoyeba te ete azali bongo, mpo kobunga wana ekopesa ye nzoto moto, akoyeba te esika azali pe makambo oyo azali kosala.

²⁹ Ezali pe bongo na moto oyo abungi mosika na Nzambe! Akosala makambo oyo akokaki kosala te na momesano. Akosala makambo oyo—oyo eleki makanisi pe ezaleli ya bato. Moto oyo abungi mosika na Nzambe, lingomba oyo ebungi mosika na Nzambe, lingomba oyo ekei mosika na Nzambe, oyo ekei mosika na mibeko ya Biblia ya Nzambe, ekosala makambo, ntango mosusu, oyo ekoki kosalama kati na lingomba na Nzambe na bomoi. Bazali koluka mbongo na masano ya lotó, kobeta loterie, kosala masano ya mbongo, nyonso oyo bakoki kosala. Bakoteya masapo, bakopesa nzela na makambo nyonso, bakobembelisa bato oyo bapesaka mosolo mingi na losambo, pe bongo na bongo, bazali kotika bango kosala oyo balingi. Ya solo. Bazali kotia na likita ya basungi mibali oyo bábálá mbala minei to mitano, kaka mpo bakoka kozua misolo, mpo esunga bango sanza mobimba. Likambo ya kosala ezali bobele moko, ezali lotomo na yo epai na Nzambe. Telema pe loba Solo! Kobunga, moto abungi akómaka lokola zoba, akómaka moto na liboma.

³⁰ Mokambi ayebi makambo, ayebi ndenge ya kosala pe eloko ya kosala. Nzambe, kati na. . . Nzambe atindelaka libota na Ye ntango nyonso mokambi. Nzambe naino azanga kosala yango te. Atindaka mokambi, kasi ósengeli koyamba mokambi yango. Omoni? Osengeli kondima ye. Osengeli kolanda nzela ye akolakisa yo. Soki okei na zamba, pe mokambi na yo alobi: “tokende na ngambo *oyo*” kasi yo, ókanisi esengeli kokende na

ngambo *mosusu*, ókobunga. Bongo, ntango. . . Ntango Nzambe atindeli biso mokambi mpo na kokamba biso, tosengeli kolanda mokambi yango. Ata tokanisi likambo nini, oyo emonani malamumu to pe mabe ndenge nini, ézali likambo na biso te ya kokata likambo yango, ezali likambo ya mokambi ye moko.

³¹ Nzambe, na Kondimana na Kala, Atindaki basakoli. Bazalaki bakambi, mpo ete Liloba na Yawe eyaka epai na mosakoli. Bazalaki bakambi. Bazalaki kopesa bato malako ndenge tolobaki lobi na mpokwa, na ntina na Yisaya pe Uziya. Bazalaki kozua malako, pe bazalaki kopesa yango na bato, pe bazalaki kokamba bango. Na bongo, Nzambe atindaka ntango nyonso bakambi na Ye, na bileko nyonso Nzambe azangaka mokambi te, ata moke te. Nzambe azalaka ntango nyonso na moto moko oyo atalisaka Ye na mokili oyo, na bileko nyonso.

³² Boye, ntango mosusu bato batangwaka na mokambi, “balongwaka na nzela,” ndenge tolobaka. Ntango Yesu azalaki awa na mokili, bobosani te oyo Yesu alobaki na Bafalisai: “Bino bakambi bakufi miso”? Bakambi bakufi miso, bakufi miso na makambo ya molimo. Bomoni? Bongo, basengelaki kozala bakambi, bakambi ya bato, kokamba bato na lobiko. Kasi Yesu alobaki: “Bokufi miso!” Pe Alobaki: “Botika bango, mpamba te soki mokufi miso akokamba mokufi miso na nzela, boye bango mibale bakokwea na libulu te?” Bakambi bakufi miso! Oh, boni mokili ebebi na likambo yango, kokambama na bakufi miso. Ye alingi te ómipesa na mayele na yo moko. Nzambe alingi te omipesa na mayele na yo moko, to na makanisi na yo moko, to na makanisi ya moto.

³³ Nzambe atindi Mokambi, pe Nzambe alingi óbosana te ete azali Mokambi oyo Ye aponi. Pe tosengeli kokanisaka Ye. Elobami awa, Yesu alobaki: “Nakotika bino te, kasi Nakobondela Tata, pe Akotindela bino Mosungi mosusu.” Pe Mosungi yango, ntango Akoya, Akokamba biso kati na Solo nyonso. Pe Liloba na Nzambe ezali Solo, pe Liloba ezali Klisto: “Ngai nazali Nzela, Solo, pe Bomoi.” Azali Liloba “Na ebandeli Liloba azalaki, pe Liloba azalaki mboka na Nzambe, Liloba azalaki Nzambe. Pe Liloba akómaki mosuni pe afandaki kati na biso.” Bongo, soki tolandi Mokambi ya malamumu pe ya solo, Molimo Mosantu, Asengeli koyebisa biso makambo oyo Amoni, makambo oyo Ayoki, pe Asengeli koyebisa biso makambo oyo ekoya. Amen. Yango wana. Akoyebisa bino makambo oyo ekoya.

³⁴ Na bongo, ntango mangomba ya lelo baboi Yango, ndenge nini tokoki kolikia kokende na Lola? Molimo Mosantu atindamelaki biso lokola Mokambi, pe biso tozali kozua kardinal moko, episkopo moko, mokengeli-mokonzi moko, to moto moko mpo na kokamba biso, nzoka nde Molimo Mosantu ápesamelaki biso mpo na kokamba biso.

³⁵ Pe Molimo Mosantu alobelaka ntango nyonso Liloba. “Ngai nazali na makambo mingi ya koloba na bino, bokoki kososola Yango sasaipi te, nde ekoya Ye, Akokamba bino na Yango.” Tala ntina na boyei ya Bilembo. Na suka ya Elembo na Nsambo, libombami na Nzambe ekokokisama, mpo na koyeba soki Nzambe azali Nani, oyo Ye azali, ndenge Abikaka, lolenge na Ye, Bomoto na Ye. Na ntango wana bosengeli kozala bino nyonso, *awa*, bomoni, ekomema biso na lolenge mobimba ya bana mibali pe ya basi ya Nzambe, Lingomba oyo esukolami na Makila na Klisto, oyo esombami na mosolo te, esombami na Makila na Yesu Klisto.

³⁶ Bongo, biso oyo, Mokambi, pe Ye azali Mokambi oyo Nzambe apesi. Sikawa, tozali kokatisa zamba, pe tozali na nzela esika moko boye, pe tokoki kokóba te kozanga Mokambi oyo. Pe moto moko te ameka kozua mokambi mosusu! Soki ósali yango, akobimisa yo na nzela. Mokambi oyo ayebi nzela! Ayebi nzela malamun mpenza. Ayebi likanisi moko na moko ezali na motema na yo. Ayebi moto nyonso azali awa. Ayebi nani yo ózali pe oyo yo ósálá, pe makambo na yo nyonso. Azali Mokambi ya Nzambe, Molimo Mosantu, pe Akomonisa yo makambo, pe Akoyebisa yo makambo oyo Akoyoka, Akoki kozongela maloba na yo mpenza pe koloba makambo oyo olobi. Amen. Akoyebisa yo oyo ozalaki, oyo ozali na yango, esika ózali kokende. Mokambi, Mokambi ya bosembo, pe Akokamba yo kati na Solo nyonso, pe Liloba na Ye ezali Solo.

³⁷ Bongo, Molimo Mosantu akosala, akoloba soki moke te “amen” na endimeli ebongisami na bato. Akoloba “amen” bobele na Liloba na Nzambe, mpo Ezali solo. Molimo Mosantu akokamba yo na nzela mosusu te. Bongo, likambo ya kokamwa, ezali ete biso nyonso, bibongiseli na biso ya minene nyonso pe bongo na bongo, tozali koloba ete tokambami na Molimo Mosantu, pe bokeseni kati na biso nyonso ezali monene koleka butu na moi.

³⁸ Kasi, ntango Polo, Mofalisai moke oyo azuaki Molimo Mosantu ntango Anania abatisaki ye, akendeki na Arabie, pe asalaki mbula misato kuna mpo na koyekola, azongaki, pe na mbula pene zomi na minei, alukaki toli soki moke te na lingomba, pe ntango akendeki kokutana na Petelo, mokonzi ya lingomba na Yelusaleme, Malakisi na bango ezalaki mpenza ndenge moko. Mpo na nini? Molimo Mosantu yango moko! Ndenge Petelo azalaki kopesa libatizi na Nkombo na Yesu Klito, Polo asalaki pe bongo, moto moko te ayebisaka ye yango. Ndenge Petelo ateyaki libatizi ya Molimo Mosantu, kobulisama, pe nyonso; Polo asalaki pe bongo, azuaki yango na lingomba te, mpo ete Ezalaki Mokambi yango moko. Na bongo, ndenge nini tokoki kozala lelo, ntango bato bazali koboya Solo oyo? Ntango Petelo apesaki malakisi na ye likolo na lolenge lingomba esengeli

kotiama na molongo, Polo azalaki na Malakisi yango moko, mpo ete bazalaki na Mokambi yango moko.

³⁹ Mokambi akomema moto moko na nzela *oyo*, pe mosusu na nzela *oyo kuna* te, pe Akotinda moto moko na estí bongo mosusu na wésti te. Akobatela bino elongo. Pe soki totiki Molimo Mosantu abatela biso elongo, tokozala moto moko. Soki—soki topesi Zabolo nzela te ete amema biso na nzela ya mabe, tokozala motema moko, likanisi moko, boyokani moko, na nzela ya Molimo moko, Molimo Mosantu, Mokambi ya Nzambe, oyo akokamba biso kati na Solo nyonso. Ya solo. Kasi bosengeli kolanda Mokambi na bino. Iyo, misie.

⁴⁰ Botala Nikodeme, azalaki na bosenga ya Mokambi, ata azalaki moto ya mayele mingi. Azalaki molakisi, na mibu soko ntuku mwambe. Azalaki moko na Bafalisai, to—to moko na basambisi ya Sanhedrin, Likita, Lisanga ya Basali. Azalaki moko na bato na bango ya minene, molakisi na Yisalaele, molakisi na bango. Bokanisa naino, molakisi ya balakisi! Iyo, ayebaki mibeko, kasi mpo na kobotama mbala na mibale, azalaki na bosenga ya Mokambi. Azalaki na posa na yango. Ayebaki esengelaki eloko mosusu ézala. Maloba na ye liboso na Klisto na butu wana etalisaki yango. Etalisaki pe makanisi ya bamosusu kati na bango, kasi moko te kati na bango azuaki mpenza—mpenza mpiko oyo ye azuaki. Moko te kati na bango akokaki kokende kuna pe kosala likambo ye asalaki. Bato nyonso bakweisaka Nikodeme mpo akendeki na butu. Ye akómaki kuna. Akómaki. Nayebi bato mingi balingaka ata kobanda te, ézala na moi to na butu. Kasi ye akómaki kuna, pe azalaki na bosenga ya Mokambi, pe alobaki: “Molakisi, biso,” basambisi ya Sanhedrin “toyebi ete Ozali Molakisi oyo auti na Nzambe.” Ayebaki yango ndenge nini? Ye atatulamaki. Bomoni, alingaki koyeba ntina ya mbotama ya sika, na bongo akendeki mbala moko epai na Moto oyo alongobani, mpo Nzambe atatulaki ete Ye azalaki Mokambi na Ye, Yesu. Botala likambo alobaki: “Molakisi, toyebi ete Ozali Molakisi oyo auti na Nzambe, mpo ete moto akoki kosala makambo oyo Ozali kosala te, soki Nzambe azali na ye elongo te.”

⁴¹ Ezalaki wana kotatolama, ete Nzambe na bomoi azalaki kati na Ye. Atatulaki yango: “Ngai moto Nazali kosala misala oyo te; ezali Tata na Ngai oyo azali kati na Ngai. Ya solo, Nazali koloba na bino ete Mwana akoki kosala likambo na Ye moko te, kasi bobele oyo Azali komona Tata kosala, Mwana akosala yango lokola. Tata azali kosala mosala, Ngai pe nazali naino kosala.” Na elobeli mosusu, Nzambe azalaki kolakisa Ye eloko nini asala, pe Ye azalaki kosala bobele yango. Azalaki kosala eloko moko te bobele yango Nzambe alobelaki Ye asala. Amen. Oyo nde makambo yango ya solo. Soki tokoki kokambama pe kozela kino Molimo Mosantu akamba mpo na kosala likambo! Yango wana. Na bongo, tomipesa mobimba kati na Klisto kino

Ye asalisa bino na makasi te lokola na ngai, kasi soki Aningisi móto na Ye moke, yo óbelemi, pe eloko moko te ekoki kopekisa yo, mpo óyebi ete ézali mokano na Nzambe.

⁴² Azalaki na bosenga ya Mokambi. Azalaki Mokambi oyo atatolami. Akokaki kokambama na Mokambi oyo, mpo ayebaki Mokambi oyo apemelamaki na Nzambe. Ayebaki ete bonkoko ye azalaki kosalela, ntango mosusu na nzela ya Bafalisai, ya Basadukai, pe soko nini mosusu, asalelaki bindimeli wana ntango molai, pe amonaki eloko moko kosalema te. Kasi Mobali moko amonisami, koloba ete Azali Masiya Biblia elakaki. Ye wana abaluki pe abandi kosala misala mpenza ya Nzambe. Yesu alobaki: “Soko Nazali kosala misala na Tata na Ngai te, na bongo bondima Ngai te. Kasi soko bokoki kondima Ngai te, bondima mpenza misala oyo Nazali kosala, mpamba te yango ezali kotatola mpo na Ngai.”

⁴³ Bongo, ezali likambo ya kokamwa te ete Nikodeme aloba: “Molakisi, toyebi ete Ozali Molakisi oyo auti na Nzambe, mpamba te moto akoki kosala makambo oyo Ozali kosala te, soki Nzambe azali na Ye elongo te.” Bomoni, azalaki na bosenga ya Mokambi, ata azalaki molakisi ya makambo. Azalaki molakisi ya lingomba na ye. Azalaki na lokumu, pe azalaki—azalaki kosala misala ya minene, azalaki moto monene; na ntembe te bato nyonso bazalaki komemia ye, na mboka mobimba. Kasi ntango ekómaki likambo ya kobotama mbala na mibale, azalaki na bosenga ya Mokambi! Ezali pe bongo mpo na biso, iyo, tozali na bosenga ya Mokambi.

⁴⁴ Koloneli, azalaki moto monene, moto na lokumu. Atongaki ba-losambo. Azalaki komemia Bayuda, mpo ayebaki ete losambo na bango ezalaki sembo. Azalaki kopesa makabo na mawa, pe azalaki kobondela mokolo na mokolo, kasi ntango Molimo Mosantu ayaki (Eloko moko ebakisamaki na lingomba), azalaki na bosenga ya Mokambi. Nzambe atindelaki ye Molimo Mosantu. Atindaki Yango na nzela ya moto oyo Petelo: “Naino ezalaki Petelo koloba Maloba oyo, Molimo Mosantu akiti likolo na ye.” [Eteni oyo ezangi maloba na bande—N.D.E.] Nzambe asalelaki Mokambi na nzela ya Petelo. Asalelaki Ye, mpo Akambaki Koloneli na nzela ya malamumu. Pe naino ezalaki ye koloba, Molimo Mosantu akitaki likolo na Bapagano wana. Bongo alobaki: “Moto akoki koboya mai mpo na kobatisa bato oyo bazui Molimo Mosantu lokola biso?” Bomoni, wana ezalaki Mokambi naino koloba, Petelo te. Mpamba te, bazalaki etonga na Bayuda. . .to ya Bapagano, “bato ya mbindo, ya bosoto” mpo na ye, pe aboyaki na ye kokende. Kasi Mokambi alobaki: “Ngai natindi yo.” Okosala makambo oyo okanisaki kosala te, ntango Mokambi azui bokonzi mobimba likolo na yo, ntango ópesi Ye nzela akamba yo. Oh, ezali malamumu kokambama na Molimo Mosantu. Ye azali Mokambi. Malamumu. Alobelaki Petelo pe Ayebisaki ye eloko asengelaki kosala. Na nsima, ntango bango

nyonso bazuaki Molimo Mosantu, alobaki: “Tokoki koboya mai, komona ete bato oyo bazui Molimo Mosantu ndenge biso tozuaki na ebandeli.” Pe babatisaki bango na Nkombo na Nkolo Yesu. Bongo, nani akambaki ye kosala yango? Mokambi oyo azalaki kati na ye. Yesu ayebisaki bango te ete “Bomitungisa na oyo bokoloba te, mpamba te, bino nde bokoloba te; kasi Tata oyo azali kati na bino, Ye moto akoloba”? Amen.

⁴⁵ Mokube oyo autaki na Yelusaleme. Nzambe azalaki na Mokambi moko na mokili na ntango wana, Molimo Mosantu, pe Azalaki na moto moko kuna oyo atondaki na Mokambi yango. Azalaki ata motei te, azalaki lokola mosungi. Azalaki kuna, azalaki kobikisa babeli pe kobengana milimo mabe, azalaki koningisa mboka makasi, esengo monene ezalaki kati na engumba. Bato nkama na nkama basanganaki pembeni na ye, pe Mokambi alobaki: “Kuna eazali mosika mingi te, tokende na ngambo oyo.” Atiaki ntembe na Mokambi na ye te.

⁴⁶ Botiaka ntembe soki moke te na Liloba ya Mokambi na bino. Bolanda Ye. Soki te, bókobunga. Pe, kobosana te, soki bótiki Ye, bókotikala bino moko, na bongo tolingi kokangama na Mokambi.

⁴⁷ Bongo, na nzela, Alobaki: “Tika bato oyo sikawa, Filipino, pe kende na biliki, esika moto moko azali te. Kasi Natindi yo kuna, pe moto moko akozala kuna ntango Nakokómisa yo kuna.” Pe tala mokube moko, azalaki moto monene na mosala ya mwasi-mokonzi na Etiopie. Bongo, azalaki koleka nzela, azalaki kotanga Buku ya Yisaya. Pe Mokambi alobaki: “Belema na likalo.”

Pe alobaki: “Ozali kososola makambo ózali kotanga?”

⁴⁸ Alobaki: “Ndenge nini nakoki kososola yango, soki moto alimboleli ngai te?” Hólála! Kasi Filipino azalaki na Mokambi. Amen. Pe abandaki uta na Makomi yango, pe asakwelaki ye nsango malamumu na Klisto. Amen. Mokambi! Kasi asololaki na ye na ntina na endimeli moko te, asololaki na ye na ntina na Mokambi, Klisto! Pe abatisaki ye kuna na mai. Na ntembe te, abatisaki ye. Oh, ndenge nalingaka yango!

⁴⁹ Ntango Yisalaele batikaki Ezipito mpo na kokende na mboka na elaka, na Esode 13:21, Nzambe ayebaki ete balekaki naino na nzela wana liboso te. Ezalaki bobele nzela ya mile ntuku minei [64 kilometele—N.D.E.], kasi ata bongo bazalaki na bosenga ya eloko moko mpo na kotambola elongo na bango. Balingaki kobunga nzela. Bongo Ye, Nzambe atindelaki bango Mokambi. Esode 13:21, elobi boye: “Natindi Mwanje na Ngai liboso na bino, Likonzi na Motó, mpo na kobatela bino na nzela,” mpo na kokamba bango na mboka na elaka. Pe bana na Yisalaele balandaki Mokambi yango, Likonzi na Móto (na butu), Lipata na moi. Soki Etelemi, bango batelemi. Soki Etamboli, bango batamboli. Pe ntango Amemaki bango pembeni na mboka yango,

pe balongobanaki te mpo na kokota kuna, Azongisaki bango na biliki. Aboyaki kokota elongo na bango.

⁵⁰ Yango nde likambo ezali kosalema na lingomba lelo. Na ntembe te, motema molai na Nzambe lelo, lokola na ntango na Nowa, lingomba ekokaki kokende uta kala, soki emibongisaki pe emitiaki na molongo. Kasi Asengeli komema biso awa pe kuna, awa pe kuna, awa pe kuna.

⁵¹ Yisalaele bayebaki mpenza te ete, ntango bazalaki koganga, komona bibembe ya basoda na Ezipito, bampunda kozinda, makalo na Falo kokweyisama, bazalaki na elonga, Mose amemamaki na Molimo, azalaki koyemba na Molimo, Miriam abinaki na Molimo, pe bana basi na Yisalaele bazalaki kokima mbangu pene na libongo, koganga pe kobina, ete bazalaki bobele na mikolo moke kino na mboka ya mabele pe ya mafuta na nzoi. Bayebaki mpenza te ete bakosala mbula ntuku minei mobimba na nzela, mpamba te babandaki kotelemela Nzambe pe Mokambi.

⁵² Bisu pe tozuami na lolenge yango moko. Soki nalongwi awa, nakokende na Shreveport. Pe Molimo Mosantu akitaki eleki mbula ntuku mitano, na Mokolo ya Matondi, na—na Louisiane, na Mokolo ya Matondi. Lingomba ekweaki uta na ntango wana! Boyebi ete lingomba Katoliko ya Roma, na ebandeli na yango, ezalaki lingomba ya pentekote? Ezali solo. Ya solo. Ezalaki lingomba ya pentekote, kasi bato ya lokumu oyo bazalaki bobele na lolenge ya kosambela babandaki kokota pe babongolaki ma—Makomi na Nzambe na bonkoko na bango, babakisaki bindimeli likolo na Yango pe nyonso. Pe botala eloko bazali na yango sikawa, ata eteni moke ya Makomi ezali te. Balongoli eloko moko pe batii eloko mosusu, eteni moke ya lipa na esika ya Molimo Mosantu. Na esika ya kozindisa moto na mai batii nde koniakela moto mai. Na esika ya “Nkolo Yesu Klisto” batii “Tata, Mwana, pe Molimo Mosantu.” Balongoli malako nyonso minene ya Nzambe oyo ekomama mpo na biso, pe bakei mosika, mosika mpenza, mosika mpenza na Malakisi ya Biblia.

⁵³ Pentekote ekitaki na Louisiane, eleki mbula ntuku mitano, pe soki eumeli lisusu mbula nkama mibale, ekokoma mosika mpenza koleka lingomba Katoliko, soki ekobi kokweya ndenge ekwei na mbula ntuku mitano oyo eleki, mpo bazali kobakisa makambo ntango nyonso, mbala na mbala. Batei ya lolenge ya kala, bazali lisusu te. Mayangani ya balabala, ata nsango na yango ezali lisusu te. Nyonso oyo tozali na yango, ezali nde ebele na makambo ya Hollywood oyo ebakisami, basi bakati suki mikuse bazali kolata bakupe, bazali kopakela-pakela, pe nyonso wana, bazali komibenga Baklisto. Ba Ricky ya nzenze ya nsinga, bazali kobeta ndule pe kobinabina, pe basi bazali kolata ba-robe ya kokanga nzoto lokola . . . lokola kwanga ezangi nkasa, toloba, bazali kobuka-buka nzoto liboso na bato, bazali kopimbwa pimbwa liboso na bato, balati biloko ya matoi ya

minene ezali bango kobina, pe bazali na lolenge ya suki oyo bakomi kokata mikolo oyo kolanda mwasi ya mokonzi, pe bazali komibenga Baklisto.

⁵⁴ Eloko tosengeli na yango, ezali losambo ya lolenge ya kalakala, oyo etindami na Nzambe, oyo ezali kopela, oyo ekozikisa nye bomoi ya mokili kati na lingomba. Esengeli kozongela Molimo Mosantu pe móto, kozongela eloko oyo ekozikisa pe ekolongola mbindo nyonso, eloko oyo ékozongisa mateya ya lolenge ya kalakala, konetola Lola likolo, pe kokomisa lifelo móto, kosembola tíyo ya bondóki. Tosengeli na mateya ya motindo wana. Kasi soki ósali yango lelo, lingomba na yo bakobwaka yo libanda.

⁵⁵ Ntango mosusu batei ya malamumu batangolamaka na nzela uta na losambo na bango. Yango wana ngai nazali kati na ebongiseli moko te. Nazali bobele na esika moko ya kozua mitindo, ezali na Lola. Bipai nyonso Akotinda ngai, nakokende. Nyonso oyo Akoloba, nakoloba yango. Tolingi makambo ya ebongiseli te. Soki lingomba oyo bolobi makambo ya ebongiseli, bokozanga mokengeli na bino na ntango wana. Nakoumela kati na yango te, ata miniti mitano te. Mangomba nyonso oyo emibongisa ekwéyá, pe bolakisa ngai moko oyo etelema lisusu. Molimo Mosantu nde atindami mpo na kokamba lingomba, kasi etonga na bato te. Molimo Mosantu azali na mayele nyonso. Bato bazali na lolenge ya libanda, bazali kotala makambo te.

⁵⁶ Nzambe ayebisaki bango ete Akotindela bango Mokambi, Akokamba bango na nzela. Pe na ntango nyonso bazalaki kolanda Likonzi na Móto, nyonso ezalaki malamumu. Akambaki bango kino na ekuke ya mboka na elaka, pe wana, Asengelaki lisusu kokende mosika te. Na nsima, Yosua, mobundi monene, bokanisa mokolo oyo alobelaki bango: “Bomibulisa, na mokolo ya misato Nzambe akofungola Yaladene awa, pe tokokatisa”? Sikawa botala malamumu likambo oyo alobaki (nalingaka yango), na Makomi, alobaki: “Bobelema nsima na Sanduku, mpamba te, boleka naino te na nzela oyo liboso.”

⁵⁷ Sanduku, ezalaki nini? Liloba. Bolanda banzela ya bibongiseli na bino te, sikawa, bobelema mpenza nsima na Liloba, mpo ete naino boleka na nzela yango liboso te. Pe, ndeko, soki ntango ezali oyo lingomba ya Baklisto esengelaki komitala, ezali nde sikawa. Tokómi mpenza na ntango ya likita oyo monene ezali kosalema na Roma, sikawa mpenza, bokabwani ezali kosalema, lisanga na mangomba, na ntango bibongiseli nyonso oyo ezali kosangana esika moko mpo na kosala ekeko na nyama, ndenge Biblia elobi yango mpenza. Pe boyebi likambo tolobaki na ntango ya lelo, na Mateya. Pe biso wana, makambo nyonso ezali wana, ekómi ppenza na ekuke, pe bato bazali kokoba kolanda bindimeli. Esengeli na bino kozala nsima na Liloba! Liloba ekomema bino na ngambo mosusu, mpo

ete Liloba ezali Klisto, pe Klisto azali Nzambe, pe Nzambe azali Molimo Mosantu.

⁵⁸ Botikala nsima na Liloba! Oh, iyo, misie! Botikala na Mokambi oyo. Botikala mpenza na nsima na Ye. Boleka liboso na Ye te, botikala nsima na Ye. Botika Ye akamba bino, bino bokamba Ye te. Bopesa Ye nzela.

⁵⁹ Yosua alobaki: “Sikawa, naino boleka na nzela oyo liboso te, boyebi eloko moko te na ntina na nzela oyo.”

⁶⁰ Kokoso lelo oyo yango wana. Ozali na bosenga ya mokambi te mpo akamba yo na nzela ya monene. Oh, oyebi banzela nyonso ya mike-mike pe mosusu nyonso. Nzela ya masumu, oyebi yango malamumu mpenza. Ezali te. . . Oh, osili koumela wana. Ozali na bosenga ya moto mpo ameka koyebisa yo likambo na yango te, oyebi banzela nyonso ya mokuse. Ya solo, masumu nyonso, oyebi yango malamumu. Moto azali na ntina ya koyebisa yo ndenge bayibaka te; oyebi yango. Moto azali na ntina ya koyebisa yo ndenge batukaka te; oyebi yango. Moto azali na ntina ya koyebisa yo ndenge basalaka makambo wana ya mabe te, mpo ete ekomamami likolo na banzete nyonso, bipai na bipai.

⁶¹ Kasi, bobosana te, bino baoyo bozali Baklisto, bokatishi na ngambo. Bozali na Mboka mosusu. Bobotami mbala na mibale. Bozali kati na Mboka yango, Mboka ya Likolo. Bozali kati na Mboka ya elaka.

⁶² Okoki kotala, oyebi ndenge ya komilukela awa. Oh, oyo, ekoki. Oyebi nini—nini, ndenge ya kosakana lisano moko boye ya kalati. Oyebi jeu de six, ntango mbuma na yango ezali kobaluka, oyebi oyo elingi koloba, pe makambo nyonso ya ndenge wana. Kasi soki ekómi mpo na koyeba bosantu, boyengebene, pe nguya na Nzambe, ndenge Molimo Mosantu asalaka pe makambo oyo Asalaka, ekozala malamumu ete otikala nsima na Liloba, Mokambi. Omoni? Naino oleka na nzela yango liboso te.

⁶³ Ee, okoloba: “Nazalaki moto ya mayele mingi, nazuaki—nazuaki diplome mibale ya inivesité.” Ekozala malamumu ete obosana yango. Iyo, misie.

⁶⁴ “Ngai natángá na likindo.” Ekozala malamumu ete obosana yango. Iyo. Ekozala malamumu ete otikala nsima na Mokambi. Tika Ye akamba yo. Ayebi nzela; yo oyebi yango te. Naino oleka na nzela yango liboso te. “Ee,” okoloba, “bango bayebi.”

⁶⁵ Totala soki bayebi. Yesu alobaki: “Baoyo bakoleka na nzela yango, bilembo oyo ekolanda bango. Na Nkombo na Ngai, bakobengana milimo mabe, bakoloba na minoko na sika; bakolokota banyoka to bakomela eloko na kufa, ekoyokisa bango mpasi te. Soki bakotia maboko likolo na bato na malali, bakobika.” Mingi kati na bango bazali koboya Yango, bazali kowangana Yango, bazali koloba ete Yango epemelami ata te. Bazali kolanda Mokambi te. Bazali kolanda endimeli moko ya

bato. Ekozala malamu ete otikala mpenza nsima na Liloba, mpo ete oleka naino na nzela yango te, oyebi.

⁶⁶ Kasi obotami mbala na mibale, pe ozali kosangana na bosantu uta na mbotama yango. Oleka naino na nzela yango te. Yo ole- . . . Soki oleki na nzela yango, osengeli koleka wana na bosantu, mpo ete ezali Mboka ya sika, Bomoi ya sika, bato ya sika.

⁶⁷ Okoya na losambo pe okoyoka moto atele mi pe azali koganga na makasi nyonso: “Nkembo na Nzambe! Alelua!”

⁶⁸ Kasi, okoloba: “Oh lala, bazalaki kosala yango na losambo ngai soki moke te! Nakotelema pe nabima na ngai!” Bomoni? Bozala na bokebi.

⁶⁹ Botikala nsima na Liloba, bongo, botika Mokambi akamba bino. “Akokamba bino kati na Solo nyonso, pe Akomonisa bino makambo oyo Nalobelaki bino. Akoyebisa bino yango. Akoyebisa bino makambo oyo ekoya,” Mokambi oyo ya solo. Botuna toli epai na eveke te; botuna toli nde epai na Mokambi. Botuna toli epai na moto mosusu te soki bobele epai na Mokambi. Ye Moto atindamaki mpo na kokamba bino. Ye Moto akosala yango. Nzambe apesi bino Mokambi. Bokamata nzela oyo Nzambe apesi.

⁷⁰ Kokoso lelo, ezali nde ete, bato oyo bazali koya na losambo, bakofanda kaka mwa moke, likambo moko esalemi oyo bamesana na yango te.

⁷¹ Nakamwaki na elenge mwasi moko oyo auti na lingomba moko ya malili ya mimesano, nauti kobondela mpo na ye. Nzambe akobikisa elenge mwasi yango. Azalaki kososola likambo oyo te. Ayebaki eloko moko te na ntina na yango. Ayaki, alobaki ete ayebaki yango te. Kasi nayebisaki ye: “Yaka kokutana na ngai.” Azalaki mwa nsoni-nsoni ná mwa kobanga, kasi Mokambi azalaki kolobela ye ntango nyonso: “Kende liboso.” Akómaki. Yango wana. Bomoni, ezali nde uta na Molimo Mosantu oyo azali kokamba biso na makambo oyo. Bomoni, Nzambe azali na nzela oyo Abongisi.

⁷² Boye bosila . . . Bosila komona mabata ya zamba oyo elekaka likolo na biso, mabata oyo ekendeke na súdi? Ee, bomikanisela, kuna, mwa libata moke wana abotamaki na etima moko boye, kuna na likolo. Ayebi bokeseni te kati na ésti, nórdi, wésti, pe súdi. Nyonso oyo ayebi, ezalaki bobele etima wana oyo ezali kuna na likolo na bangomba ya Canada. Abimá naino libanda na etima yango te, kasi abotama mokonzi. Mwa libata-mobali wana abotama mpo na kozala mokonzi. Mbala moko, na butu, matandala ekiti mingi likolo na bangomba. Nini esalemi? Mopepe wana ya malili ekiti kouta kuna. Nakoki komikanisela komona ye kolenga na malili, alobi: “Mama, oyo elingi koloba nini?” Bomoni, naino ayoká malili ya bongo te. Abandi komona pembeni-pembeni, abandi komona pembeni-

pembeni na etima, ebandi kokangama na malili, mai ya etima ekómi glas. Ayebi te, kasi mbala moko . . . Abotamá mpo azala mokambi ya etonga na mabata wana. Akopumbwa na kati na etima yango, ntango esimbaki ye. Okoki kobenga yango ndenge olingi. Bisó tobengaka yango mpemela, to bokoki kobenga yango, oh, bobele mayele, soki nini. Akokende na etima na mai, ná monoko na ye atomboli likolo, akobanda kolela: “Kwee-kwee, kwee-kwee!” Pe mabata nyonso ya etima bakoya mbala moko pembeni na ye. Mpo na nini? Bayebi mokonzi na bango, bobele na lolenge na ye ya kolela.

⁷³ “Soki kelelo ebetami malamú te, nani akomibongisa mpo na etumba?” Ya solo. Nani akoki komibongisa mpo na etumba, soki babeti kelelo malamú te?

⁷⁴ Ee, soki libata wana abeti kwee-kwee na ye malamú te, nani akomibongisa mpo na etumba? Libata wana, ná monoko na ye atomboli yango likolo, akolela: “Kwee-kwee, kwee-kwee!” Pe mabata nyonso bakoya pembeni na ye. “Kwee-kwee, kwee-kwee!” Bango wana basangani. Bakozala nde na yubilé mpenza, kaka na etima wana, bakobaluka ngambo na ngambo, ngambo na ngambo. Nsima na ntango moke, akoyoka eloko moko kosala kati na ye, esengeli ete akende. Akosembola mapapu na ye pe akopumbwa likolo na etima yango, akomata na mipepe pe akobaluka mbala minei to mitano, akokende semba mpenza na ngambo ya Lousiane, ná mabata nyonso na nsima na ye. “Kwee-kwee, kwee-kwee,” ye wana akómi. Mpo na nini? Azali mokambi! Amen! Mabata bayebi mokambi na bango, kasi lingomba te. Iyo, ayebi eloko nini asala.

⁷⁵ Botala mabata ya zamba wana, oyo bautaka epai na epai kuna na Alaska. Bongo, mobange ya libata moko ya mobali akambaka bango ntango nyonso, pe mabata ya zamba wana basengeli kotala libata ya mobali wana malamú mpenza. Basengeli koyeba makambo libata mobali wana azali koloba. Bosila kotanga yango, na zulunále *Look*, eleki penepene mbula minei, mokolo moko, mobange ya libata moko ya mobali, oyo ayebaki makambo azalaki kosala te, pe akambaki etonga mobimba ya mabata ya zamba kino na Angletere? Ezali ya solo. Naino bamonáká mabata wana na Angletere liboso te. Mpo na nini? Batalaki mokonzi na—na bango te. Mobange ya libata mobali wana ayebaki esika azalaki kokende te. Pe lelo oyo bazali kuna, pe bakoki kozonga te.

⁷⁶ Yango nde likambo oyo ezali kokómela mabata mingi ya zamba lelo, bazali kokoba kotambola elongo. Bazali koloba, zulunále *Look* elobi ete mabata yango ya zamba batambolaka elongo, pe bapumbwaka bipai nyonso kuna na Angletere, kasi bayebaka nzela ya kozonga te. Ezali pe bongo mpo na *mabata* mosusu ya zamba oyo nayebi. Bozali kosangana, mayangani minene ya kolamuka, bokobenga motei moko ya kolamuka mpo áya koteya na mwa ntango moko boye, kasi bozali koyeba esika

bozali kokende te. Bozali kobaluka kaka esika moko, mpo ete bozui mwa libata moko ya mobali oyo azali kokamba bino na feti moko ya ebongiseli, na esika ete azongisa bino na Liloba na Nzambe, azongisa bino na libatizi ya Molimo Mosantu. Pe na nsima, tozali komituna mpo na nini tozali na kolamuka te na mikolo na biso. Bomoni? Bosengeli kozala mpenza na Mongongo wana! Mongongo yango, ezali nde kelelo ya Nsango Malamu, oyo ezali koyokisa Nsango Malamu, Liloba na Nzambe moko na moko. Endimeli te, ebongiseli te; kasi Biblia, Molimo Mosantu. “Bilembo oyo ekolanda bango bakondima.” Bomoni? Pe bango wana basimbi nzela bakei.

⁷⁷ Mobange moko ya libata mobali, mokolo moko, balobaki ete etonga mobimba ekufaki na ntina na ye, amekaki kopumbwa elongo na bango na kati ya molili, ye moko ayebaki esika azalaki kokende te, pe bango nyonso batutanaki na bangomba oyo ezalaki kuna, pe bamosusu kati na bango bapanzanaki, mike-mike. Ya solo mpenza! Basengeli koyeba mpenza mongongo wana. Mwa libata wana, soki azali na mongongo na ye moko, pe moto nyonso ayebi yango, bazalaka na mwa yubilé na bango ntango basanganaka, pe bango wana bakei na súdi. Mpo na nini bakendeke na nse kuna? Kuna malili ezali te.

⁷⁸ Bongo, soki Nzambe apesaki libata mayele oyo ekoki mpo na koyeba ndenge ya kokima malili, boni Asengelaki pe kopesa yango na lingomba? Soki libata akoki kosala bongo na mayele, bongo Molimo Mosantu kati na lingomba? Asengelaki komema biso mosika na mimesano ya kala, bindimeli pe nyonso, kino na libatizi ya nkembo pe ya kitoko ya Molimo Mosantu. Oyo ezali kobota nguya, mayele, motema molai, kozala lokola Nzambe, pe Molimo Mosantu. Mokambi ya solo akokamba bino nde na yango, mpo ete Akobimisa na monoko na Ye eloko mosusu te bobele Nsango Malamu, bobele Liloba na Nzambe. Na ntembe te, bozali na bosenga ya Mokambi!

⁷⁹ Ntango bato na mayele, bayebaki eloko moko te na ntina na Nzambe. Bazalaki—bazalaki kosala misala ya soloka, bato na soloka. Bazalaki kuna na ebimelo na ntango. Boyebi, Biblia elobi: “Tosili komona Monzoto na Ye na Ebimelo na ntango pe toyei kokumbamela Ye.” Bazalaki bato ya elimwelo na ntango, batalaki na ebimeli na ntango pe bamonaki Monzoto na Ye. . . to batalaki na elimwelo na ntango, Bazalaki na Ebimelo na ntango. Tozalaki na Ebimelo na ntango, pe tomonaki Monzoto na Ye na elimwelo na ntango. Bomoni? “Tosili komona Monzoto na Ye na Ebimelo na ntango.” Pe, bomoni, bazalaki na Ebimelo na ntango. “Ntango tozalaki na Ebimelo na ntango, tomoni Monzoto yango, pe toyei kokumbamela Ye.”

⁸⁰ Nakoki komikanisela, komona mibali yango komilengela mpo na kokende. Nakoki komikanisela moko na basi na bango koloba na ye, alobi: “Tala, obongisi biloko nyonso, bongo bousole na yo yango wapi?”

Alobi: “Ngai—ngai nakosalela bousole mbala oyo te.”

⁸¹ Alobaki: “Okosala ndenge nini mpo na kokatisa bangomba?” Bomikanisela, esengelaki ete bakatisa Ebale ya Tigre pe baleka na kati na bilanga, na bokuse, basengelaki kosala mobembo ya mbula mibale likolo na mokongo ya kamela. Balingaki kokóma ndenge nini? Mwasi yango alobaki: “Ee, ózui ata bousole te.”

Alobaki: “Te.”

“Okokende ndenge nini?”

⁸² “Nakolanda nzela oyo Nzambe abongisi. Monzoto oyo kuna, ekokamba ngai epai ya Mokonzi yango.” Yango wana.

⁸³ “Tosili komona Monzoto na Ye na Ebimelo na ntango, pe tolandi Yango kino awa na elimwelo na ntango, mpo na kokumbamela Ye. Wapi Ye?” Balandaki nzela oyo Nzambe abongisaki. Batelemaki mwa ntango moke, uta na ebele na bindimeli kuna. Bakotaki na Yelusaleme, pe babandaki komata pe kokita na balabala, bato oyo balataki bilamba ya kitoko, bazalaki koloba: “Wapi Ye? Wapi Ye oyo abotami Mokonzi na Bayuda?” Ee, ezalaki mboka mokonzi, ezalaki Yelusaleme. Na ntembe te ete lingomba monene esengelaki koyeba Likambo yango. “Wapi Ye? Wapi Ye oyo abotami Mokonzi na Bayuda? Tosili komona Monzoto na Ye na Ebimelo na ntango, toyei kokumbamela Ye. Wapi Ye?”

⁸⁴ Kasi, bakendeki kotuna mokengeli *Songolo* pe nganga mokonzi *Pakala*, moto moko te kati na bango ayebaki Likambo yango. “Kasi, Abotami, Ye oyo azali Mokonzi na Bayuda, wapi Ye?” Bayebaki yango te.

⁸⁵ Nzoka nde, etonga moko ya bakengeli ya mpate ezalaki kuna, na kokita ya ngomba, oyo bazalaki kosepela mpenza, iyo, misie, mpo ete bayaki pe balandaki nzela oyo Nzambe abongisaki.

⁸⁶ Bongo, baumelaki wana, pe mbala moko alobaki: “Nakoyebisa bino eloko tosengeli kosala, esengelaki ete toyanganisa likita.” Bongo babengaki likita ya Sanhédrin, pe—pe bazalaki komituna soki bayokaki nsango ya Likambo yango. “Te, toyebi eloko moko te na ntina na Yango.”

⁸⁷ Ezali pe bongo lelo. Bayebi eloko moko te na ntina na Mokambi oyo, Molimo Mosantu oyo abikisaka babeli, oyo Atondisaka, oyo Abikisaka milimo, oyo Azali kozonga. Mokambi oyo ayebisaki biso makambo nyonso oyo esalemi, pe tozali mpenza na kati na yango. Mososoli na makanisi ya mitema; bayebi eloko moko te na ntina na Yango, bazali kobenga Yango botangi makanisi to eloko moko bongo. Bayebi eloko ya koloba mpo na Yango te.

⁸⁸ Bongo, bomoni, bato na mayele oyo, na ntango nyonso. . . Bomikanisela, ntango bakotaki na Yelusaleme, Monzoto yango elimwaki. Na ntango nyonso ózali kotalela bindimeli pe bato ya bibongiseli ete bakamba yo epai na Nzambe, lisungi na Nzambe

ekotika yo. Kasi ntango balembaki pe bayebaki lisusu eloko ya kosala te, pe batikaki bango pembeni, batikaki bindimeli pe bibongiseli wana ya Bayuda, pe balongwaki na Yelusaleme, na bongo Monzoto yango ebimaki lisusu, pe basepelaki na esengo monene mpenza. Bamonaki Mokambi lisusu! Oh, esengo oyo ezalaka, kozala na kati na lingomba moko ya mimesano pe ya malili, pe na nsima kozonga na kati na lingomba ya kitoko pe ya móto, komona ndenge Mokambi akambaka, bokeseni nini boye! Iyo, “Tosili komona Monzoto na Ye na Ebimelo na ntango, pe toyei kokumbamela Ye.”

⁸⁹ Yosua alobaki na bango: “Sikawa bolanda Sanduku, mpo ete naino boléká na nzela yango liboso te.” Nzambe alingaki kotika Sanduku yango ekende esika mosusu te bobele na nzela ya malamumu. Moto nyonso alandaki Yango, pe Yango ekatisaki mpenza Yaladene.

⁹⁰ Ezali pe bongo lelo, na nzela ya Molimo Mosantu. Iyo, misie. Nzela bobele moko mpo na biso ya koyeba soki ezali Molimo Mosantu to te, tozali kotala komoni- . . . komonisama na Yango, komonisama oyo etatolaka Liloba na Nzambe.

⁹¹ Bongo, eumeli te, etonga moko ya bandeko bazalaki na makila pe na mafuta, pe ezali malamumu soki balingi kosala bongo. Ngai. . . Mpo na ngai, ezali kotatolama te. Esengeli nde kotatolama ya Makomi, bomoni, bobele ete yango étatola oyo Nzambe alobi, ezali malamumu. Bazalaki koloba: “Ntina bozali na Molimo Mosantu, ezali mpo ete bozali na mafuta na maboko na bino.” Bongo, ngai—ngai nakoki kondima yango te. Bomoni? Te, nandimi te ete mafuta wana ezali na likambo moko na kati kuna. Pe soki makila wana ekoki kobikisa babeli pe kopesa lobiko, bongo Makila na Yesu Klisto esalaki nini? Soki mafuta wana ezali kobikisa babeli, bongo mapipi na Ye ekosala nini? Bomoni? Bomoni?

⁹² Nalingaka soki eyei nde Mokambi, oyo Azali kokamba yo kati na Solo ya Liloba, na ntango yango oyebi ete ozali kolanda ntina, pe ete obelemi mpo na kokende. Ya solo, ózali komilengela mpo na kopumbwa. Iyo, misie. Iyo, mpo na nini bongo? Mokambi Moto Azali kokómisa likambo yango solo.

⁹³ Nazali na eteni moko ya Likomi awa, napesaki biteni ya Makomi oyo, kasi nalingi kotanga oyo boye. Ezali nde Petelo ya Mibale, mokapo ya 1, nzela ya 21.

*Mpo . . . esakweli moko te ebimaki na mokano na moto,
kasi bato bauti na Nzambe balobi wana ezalaki bango
kopusama na Molimo Mosantu.*

⁹⁴ Esakweli eyaki ndenge nini? Na mokano na moto te, na bindimeli ya bibongiseli te; kasi na mokano na Nzambe, ntango bato na bulee bapusamaki na Molimo Mosantu. Azalaka ntango nyonso Mokambi na Nzambe. Ezalaki Molimo Mosantu oyo azalaki kati na Likonzi na Móto oyo wana, moto nyonso ayebi

ete ezalaki Klisto. Mose atikaki Ezipito, atangaki ete kotiolama esika moko na Klisto ezali na motuya monene koleka bibombelo nyonso ya Ezipito. Ezalaki nde Klisto. Ee, ntango bazalaki kuna pe balobaki: “Ee, Yo olobi ete Ozali . . . Kasi, Olekisi naino mbula ntuku mitano te, pe Óloba ete Omoni Abalayama?”

⁹⁵ Alobaki: “Liboso ete Abalayama azala, NGAI NAZALI.” NAZALI Moto akutanaki na Mose kati na Likonzi na Móto na nzete ekopela móto. Iyo, misie. Azalaki Nzambe akómi mosuni. Moto ya misato te; kaka Moto yango kati na misala ndenge na ndenge. Banzambe misato te; misala misato ya Nzambe moko. Ya solo mpenza.

⁹⁶ Malamu, bongo, Makomi. Na ntango nyonso Nzambe apesaka, Apesaka nde oyo ya malamu koleka. Ntango Nzambe apesaki nzela mpo na kolendisa lingomba na Ye, Apesaki nde oyo ya malamu koleka. Ntango Apesaki epai na Adama pe Ewa, na elanga na Edene, eloko Apesaki bango ezalaki nde Liloba na Ye. “Botikala na nsima ya Liloba oyo, pe wana bozali kati na kobatelama. Kasi soki bobimi libanda na Yango, mokolo bokolia yango, mokolo yango bokokufa.” Nzambe abóngólá lolenge na Ye ya kosala soki moke te. Satana pe abóngólá oyo ya ye soki moke te; ndenge asalaki mpo na kokotela Adama na Ewa, azali kokotela bato lelo kaka bongo. Ndenge nini? Na koluka kobanza likolo na Yango. “Tala, ekozala malamu kokanisa ete Nzambe akosala yango te. Oh, Nzambe alobaki,” ndenge Satana alobaki, “kasi ya solo mpenza ete Nzambe ya bulee akosala yango te.” Ya solo mpenza Akosala yango, mpo ete Alobaki ete Akosala yango!

⁹⁷ Pe ezali likambo oyo bato bazali koloba lelo: “Oh, sikawa, zela mwa moke! Ondimi mpenza ete soki nakei na losambo pe nafuti dime na ngai, pe nasali *boye*, na *boye*, Nzambe akobwaka ngai?” Soki moto abotami mbala na mibale te, akoki ata kososola Bokonzi na Nzambe te! Bomoni? Bolimbisi ezali te! “Ee, mobange ya papa wana, mobange ya mama wana, azali moto na mpiko mpenza.” Lolenge moko mpamba oyo bakoki komona Nzambe, ezali nde kobotama mbala na mibale. Esili. Ata soki bazali mike, bazali mikóló, bazali bilenge, ata basali nini, ata mbala boni bakendeke na losambo, ata bayebi bibongiseli boni, ata bindimeli boni bakoki kotanga. Osengeli kobotama mbala na mibale, soki te ozali ata likolo na moboko te, mpo na kobanda. Ezali mpenza ya solo.

⁹⁸ Bongo, omoni, ozali na bosenga ya Mokambi. Akokamba yo kati na Solo, pe Solo ezali nde Liloba. Akokamba yo. Pe ezalaka ntango nyonso kaka bongo. Nzambe azali na ntina ya kobongola eloko soko nini te, mpo ete Ye azangi suka, pe Ayebi oyo eleki na malamumu. Azali bisika nyonso, Ayebi makambo nyonso, Ye azali—Ye azali nyonso. Ya solo, ezali oyo Nzambe azali, na bongo Azali na ntina ya kobongwana te. Malamu.

⁹⁹ Ye Moto andimisaka nzela oyo Azali kokamba yo. Molimo Mosantu, Mokambi, Ye moto andimisaka Liloba yango moko oyo Ateyaka. Bongo, Luka akambamaki na Mokambi, mpo na koloba: “Bokende na mokili mobimba, kosakola Nsango Malamu epai na bato nyonso. Moto nani akondima pe akobatisama akobika; kasi moto nani akoboya kondima akokweya. Bilembo oyo ekolanda bango bakondima: na Nkombo na Ngai bakobengana milimo mabe, bakoloba na minoko na sika, bakolokota banyoka, bakomela biloko na kufa, bakotia maboko likolo na bato na malali pe bakobika.” Pe Biblia elobi ete “bakendeki bipai nyonso,” bakambamaki na Mokambi, boyebi, “bateyaki Liloba, ná bilembo elandaki Yango.” Ezalaki nini? Mokambi azalaki kotatola Yango ete ezali Solo!

¹⁰⁰ Ezalaki lolenge na Nzambe ya kosala. Ezali lolenge oyo yango etiamaki. Mwango na Ye nde yango wana; Akoki kobongola yango te, mpo ete Ye azangi suka. Amen. Akoki kobongola yango te; Azali Nzambe. Ngai nakoki kobongwana; nazali moto. Yo okoki kobongwana; ozali mobali to mwasi. Kasi Nzambe akoki kobongwana te. Ngai nazali na suka; nakoki kosala mabunga pe koloba makambo oyo ebongi te, biso nyonso tokoki kosala yango. Kasi Nzambe akoki kosala yango te, pe ázala Nzambe. Mokano na Ye ya liboso ebongi be. Lolenge oyo Nzambe asalaka soki Akoti na mosala, ezali lolenge oyo Asengeli kosala na ntango nyonso. Soki esengami ete Akota na mosala mpo na kobikisa moto na masumu, Akobikisa ye bobele likolo na moboko ya likambo moko. Mbala na nsima ntango moto na masumu akoya, Asengeli kosala kaka ndenge yango, soki te Asalaki mabe ntango Asalaki mbala ya liboso. Amen. Nalingi Ye. Nayebi ete ezali Solo.

¹⁰¹ Nazali na mbula ntuku mitano na misato, eleki mbula ntuku misato na misato na ndambo oyo nazali koteya Nsango Malamu awa, naino námóná Yango kokweya ata mbala moko te. Námóná Yango komekama na mokili mobimba, mbala nsambo, na kati ya ba-losambo nyonso ya ndenge na ndenge pe nyonso mosusu, liboso na bato soko nkoto nkama mitano, na ntango moko boye, pe Ekwéyá soko moke te. Nazali koloba makambo oyo nátanga na buku moko boye te, nazali koloba makambo oyo ngai moko nabikeli, oyo nayebi ete Nzambe andimisaka Liloba na Ye pe Amemiaka Yango. Bongo, soki ózali nde na mwa endimeli moko boye, ekozala malamu ete ókeba. Kasi Molimo Mosantu akondimisa Liloba na Nzambe.

¹⁰² Na Yoane, mokapo ya 1, pe na nzela ya 1, alobaki: “Azali Liloba. Azali Mokambi. Na ebandeli Liloba azalaki, Liloba azalaki mboka na Nzambe, pe Liloba azalaki Nzambe. Pe Liloba akómaki mosuni pe Afandaki kati na biso.” Oh!

¹⁰³ Petelo akambamaki mpo na koloba, na Misala 2:38, lolenge ya kozua Molimo Mosantu, alobaki: “Bobongola mitema, moko moko na bino, na nsima bobatisama na Nkombo na Yesu Klisto

mpo na kolimbisama na masumu na bino, na nsima Mokambi akotala makambo na bino mpo na mikolo oyo etikali.” Iyo, likambo ya kosala nde yango wana. Ya liboso, bobongola mitema mpo na masumu na bino, na kozanga kondima na bino, ndenge bozangaki kondima makambo yango. Bobongola mitema, na nsima bobatisama, pe na nsima Mokambi akotala makambo na bino mpo na mikolo oyo etikali. Bomoni, ezali lotomo na bino. Ezali lotomo na yo ete óbongola motema. Ezali lotomo na yo ete óbatisama. Na nsima, ezali lotomo ya Mokambi ete atala makambo na yo mpo na mikolo oyo etikali, Amema yo longwa na nguya kino na mayele, na kokanga motema, na motema molai, na kozala lokola Nzambe, na bolingo na bandeko, pe Molimo Mosantu akotia yo elembo. Omoni? Na bongo ókómi na epimelo mobimba ya Nzambe, mobali ya solosolo mpo na Nzambe, mwasi ya solosolo mpo na Nzambe, oyo akangami makasi kati na Klisto. Nalingi yango, oyo akangami makasi kati na Klisto.

¹⁰⁴ Iyo, Malako akambamaki na Molimo Mosantu, mpo na kokoma Malako 16, na ntembe te.

¹⁰⁵ Yoane akambamaki, ntango akomaki Emoniseli. Akambamaki na Mokambi. Akambamaki pe na Molimo mpo na koloba: “Moto soko nani akolongola Liloba moko na Yango, to akobakisa liloba moko na Yango, ye akolongwa, likabo na ye, ekolongwa na Buku na Bomoi.”

¹⁰⁶ Sikawa, ndenge nini ókotia eloko mosusu na esika ya Liloba na Nzambe, pe ókoba koloba ete ókambami na Molimo Mosantu? Ezali kosimba te, boye te? Te, misie. Ata moke te.

¹⁰⁷ Azalaki Mokambi na ngai, kati na bomoi na ngai. Akambi ngai kino na Bomoi. Ye Moto amemi ngai na Bomoi, pe Azali Bomoi na ngai. Soki Ye te, nazali na Bomoi te. Soki Ye te, nazali na bosenga ya eloko mosusu te. Azali nyonso, Nyonso na ngai kati na Nyonso. Na ba-ntango na ngai ya kokoso, Asungaka ngai. Lobi Apambolaki ngai, lelo bazali kosala kaka bongo. Nakotalela nini? Kaka likambo yango, nkembo na Nkombo na Ye! Amen. Iyo, misie. Alakaki yango. Akosala yango. Azali Bomoi na ngai, Azali Mokambi na ngai, Nyonso kati na Nyonso. Natieli Ye motema. Nalekaki na mimekano ya makasi. Natielaka Ye motema, bisika nyonso nazali kokende. Nakolinga pe ete bino bosala kaka bongo. Soki bokei kosukola bilamba, bino basi, botiela Ye motema. Soki bokei na víli, botiela Ye motema.

¹⁰⁸ Mbala moko ekómelaki ngai kokanisa ete nazali mpenza lokola moto ya zamba, boyebi, mpo ete nazalaki kosala bokila mingi. Nakanisaki: “Nazali mpenza koleka na makambo ya ndenge nyonso, moto moko te. . . Okoki kobungisa ngai te. Mama na ngai azalaki ndambo mo-indien, nalingaka yango. Hólála! Okoki kobungisa ngai na zamba te, nayebi esika nazali.”

¹⁰⁹ Pe mpo na mobembo na ngai ya babalani ya sika, nasalaki lokola kokosa mwasi na ngai mwa moke, nayebisaki ye:

“Molingami, oyebi, ekozala malamu mpo na biso ete tobalana mokolo ya ntuku mibale na misato ya sanza ya zomi.” Na ntembe te, ezali mpenza mokolo oyo Nkolo ayebisaki ngai ete tosala yango.

¹¹⁰ Pe namilobelaki: “Sikawa, mpo na mobembo na biso babalani ya sika, natiaki mbongo pembeni, nakomema mwasi na ngai mpo na kotala Chute ya Niagara, pe nakokende na bangomba ya Adirondack mpo na kosala bokila moke.” Bomoni? Bongo nakendeki na ye, ye na Billy, ye azalaki mpenza bebe. Na bongo, nasengelaki komema mwasi na ngai na mobembo ya babalani ya sika, pe ezalaki lisusu mobembo ya bokila, bomoni. Bongo—bongo namilobelaki ete ekozala likambo ya malamu kosala bongo. Bongo, namemaki ye kuna, pe. . .

¹¹¹ Nakomelaki Misie Denton monkanda, mobateli ya zamba. Pe tolingaki kokende na bangomba ya Hurricane. Nalobaki: “Misie Denton, nakoya kuna, nazali na mposa ete ngai na yo tokende bokila ya ngombolo na eleko ya molunge oyo.”

¹¹² Pe alobaki: “Malamu, Billy, yaka na yo.” Bongo, alobaki: “Nakozala kuna mokolo boye.” Ee, ngai na mwasi na ngai, tokómaki kuna mokolo moko liboso, ná Billy, bongo, mwa ndako yango ekangamaki na lifungola. Mbalasani moko ya moke ezalaki mwa mosika kuna na zamba.

¹¹³ Kuna nde esika, ngai na Ndeko Fred Sothmann tokendeki eleki ntango molai te, tozalaki kuna. Molimo Mosantu, namonaki Ye, Azalaki wana, Pole wana ya langi ya mosaka oyo ezalaki kotambola kati na banzete, pe Fred azalaki wana. Alobaki: “Yaka pembeni epai boye, nalingi kosolola na yo. Lobi,” alobaki: “zala na bokebi, batieli yo motambo.” Alobaki: “Sala keba!” Ezali ya solo, Ndeko Fred? Nakendeki pe nayebisaki bato nkama na nkama likambo yango na mpokwa wana, kuna na Vermont, nalobaki: “Batieli ngai motambo; nakomona ndenge ekozala. Nayebi esika ekozala te.” Pe kaka na mpokwa oyo elandaki, tala, ezalaki wana. Nalobaki: “Motambo oyo batii yango oyo.” Iyo, misie. Kasi Molimo Mosantu akambaki ngai, Alakisaki ngai eloko ya kosala. Pe, hólála, ezalaki mpenza solo! Oh, mingi kati na bino bayebi likambo oyo esalemaki. Nazali na ntango ya koloba yango te.

¹¹⁴ Kasi tozalaki kuna, na ntango wana, pe malili ebandaki mpenza kosala mokolo wana. Misie Denton alingaki koya mokolo oyo ekolanda, nalobaki: “Oyebi, molingami, elingaki kozala malamu soki nakokaki kozua mbu—mbuli moko ya monene mpo na komema na ndako.” Nalobaki: “Biso. . . Nasengelaki kobatela mbongo na ngai, pe toutaki kobalana.” Pe nalobaki: “Tolingaki kozua nyama na biso ya kolia na eleko ya mpio, soki nakokaki kosala bokila lelo.”

¹¹⁵ Pe alobaki: “Ee, kende, Billy.” Alobaki: “Sikawa, kobosana te ete ngai naino nakóma na zamba oyo te,” alobaki. Azalaki

na ntaka ya mile soko ntuku mibale na mitano [40 kilometele—N.D.T.], kuna na bangomba, bomoni, pe alobaki: “Ngai nayebi eloko moko te na likambo oyo.” Pe alobaki: “Bongo ngai. . .”

¹¹⁶ Nalobaki: “Ee, sikawa, ózali komikanisela, eleki mbula mibale, nabomaki ngombolo misato wana. Ezalaki kaka na nsima ya nsonge ya ngomba oyo kuna.” Pe nalobaki: “Sikawa, nakoboma mbuli ya monene, pe nakoboma ngombolo,” pe nalobaki: “tokozua nyama na biso ya kolia na eleko ya mpio.” Ee, emonanaki lokola mwa malamumu, bomoni. (Tobukaki bambuma ya mûre, pe tomisombelaki makala oyo tosengelaki na yango mpo na—mpo na eleko ya mpio wana; na bongo, Billy moto azalaki koteka yango, ngai ná Meda tozalaki kolokota yango, soki nasilisi mosala na ngai ya kosenzela.) Bongo na nsima, na—nalobaki: “Ee, nakozua bondóki na ngai, nakokita awa.” Nalobaki: “Mbuli ezali mingi na esika oyo, nakoboma moko.” Pe nalobaki: “Oyebi,” nalobaki: “bongo nakoboma yango.” Nalobaki: “Ee. . .nakoumela te.”

Alobaki: “Malamu.”

¹¹⁷ Bongo, ntango nakendeki, ezalaki mwa molili. Pe mingi kati na bino bato ya New Hampshire, pe ya kuna na Nouvelle Angleterre, boyebi ndenge esalaka ntango londende ekitaka, to na esika nini na bangomba, okoyeba lisusu esika ózali te. Esili. Okoki ata komona loboko na yo liboso na yo te. Na bongo, nakatisaki mwa e—esika moko lokola bakatá ba nzete, nakitaki, pe nakatisaki na ngambo na nzela, namataki lisusu. Pe namonaki nkoi, ndenge bobengaka yango awa na etuka oyo. Na ésti, biso tobengaka yango cougar. Kuna, babengaka yango nkosi ya ngomba. Kaka nyama yango moko. Ezali puma, ya solo mpenza ezali yango. Kaka na libota yango ya nyáo, na bolai penepene ya pied libwa [2,75 m—N.D.T.], oyo ezalaka na kilo penepene ya livre nkama na ntuku mitano, to nkama mibale [68 to 90 kg]. Akatisaki na nzela, pe nabimisaki bondóki na ngai na mbangu nyonso, kasi na mbangu mpenza mpo na kobeta ye te.

¹¹⁸ Ee, namataki likolo na ngomba malembe, kolanda cougar yango, nazalaki kotala nkasa mpo na komona esika alekaki, boyebi. Nazalaki koyoka ye. Azalaki na makolo minei. Nayebaki ete azalaki nyama ya makolo mibale te, azalaki na yango minei. Pe nayebaki ete ezalaki mbuli te, mpo ete mbuli anyataka mabele makasi. Pe azalaki kotambola malembe-malembe, nkoi wana, boyebi, ndenge wana. Bongo ngombolo, ye abendaka makolo soki azali kotambola. Na bongo, nayebaki na ntembe te ete ezalaki nkoi. Azalaki na nsima ya mobimbi ya nzete moko na nse, pe namonaki ye te, na mbala moko namoni ye, pe akei.

¹¹⁹ Nazalaki komona ndenge azalaki koningisa nkasa, boyebi, na nsonge ya ngomba, pe kokita boye, pe nazalaki kokeba na lipata wana oyo ezalaki kokoba kokita te, boyebi, oyo ezalaki kokita, londende. Nakitaki malembe, nakatisaki lobwaku moko

ya monene, pe nakotaki na zamba Géants, na kolandaka nkoi yango. Nazalaki komilobela: “Nsima na mwa ntango nakozua ye.” Nazalaki komona esika moko, nazalaki komata na esika moko ya likolo, pe nazalaki kotala bipai nyonso ndenge wana, pe nazalaki kobwaka miso bipai na bipai, kotala soki nakoki komona ye; kotia litoi na bokebi mpenza, pe nazalaki kokita, kokita lisusu malembe. Makelele ya nzete ya mike-mike ezalaki koyokana mpenza liboso na ngai, ndenge azalaki kokende. Bomoni, kuna, akómaki na esika ya banzete mpenza, na ntango wana nakokaki lisusu kolanda matambe na ye te. Bomoni, akomaki mayele, azalaki komata likolo na banzete, pe azalaki kopumbwa longwa na nzete moko kino na nzete mosusu. Ayebaki ete kuna nakokaki lisusu kolanda matambe na ye te. Oh, namilobelaki: “Oh, mafú!”

¹²⁰ Bongo nabandaki komata na canyon, pe nayokaki nsolo ya ngombolo, mobange ya ngombolo ya mobali. Namilobelaki: “Oyo, nakozua ye sikawa, malamú!” Nayokaki nsolo yango lisusu, pe napusanaki liboso mwa moke, natalaki na bokebi bilembo ya lolenge nyonso pe nyonso. Namonaki eloko te; nabalukaki mpo nakita, nazongaki na ngambo mosusu ya ngomba. Kuna nde nabandaki komona ete mwa londende ezalaki. Pe nayokaki nsolo yango lisusu, azalaki pembeni wana, na likolo. Namilobelaki: “Te. Sikawa, likambo nini, mopepe ezali kouta ngambo *oyo*, pe nayaki. . . Nsolo ya ngombolo euti na ngambo oyo *kuna*, pe nakatisi sikawa epai boye, mopepe ezali kouta na ngambo oyo mosusu. Bongo, nasengeli kozonga esika nayokaki nsolo ya ngombolo oyo liboso, pe nalanda yango banda kuna.”

¹²¹ Pe na bozongi na ngai, natalaki na ngambo mosusu ya canyon, namonaki matiti ezali koningana. Pe na ntango yango, eloko moko ya moindo eninganaki. Namilobelaki: “Ye wana.” Nakotisi lisasi na bondóki noki-noki, na mbangu mpenza, pe natelemi nye. Pe, na ntango yango, ezalaki nde mbuli ya mobali ya monene, ya monene mpenza. Namilobelaki: “Yango mpenza oyo nasengelaki na yango, ata bongo.” Nabetaki mbuli yango masasi.

¹²² Namilobelaki: “Ee!” Nayebaki ata moke te ete ezalaki mwa. . . Ntango nasilisaki kosasa ye, namonaki ete. . . Nasukolaki maboko pe napangwisaki mbeli na ngai, nazongisaki yango. Namilobelaki: “Nkembo na Nzambe! Matondi na Yo, Nkolo Yesu, Opesi ngai nyama na ngai ya kolia na eleko ya mpio. Nzambe akumisama!” Nazuaki bondóki na ngai. Namilobelaki: “Nakomata sikawa mbala moko awa na canyon.” Nalobaki: “Tala naino, moninga, ekumbaki ezali koya. Ekozala malamú ete nabima awa pe nazonga esika Meda na bamosusu bazali.” Nalobaki: “Esengeli ete nasala noki-noki.”

¹²³ Namataki na canyon, nafungolaki ba-butó ya kazaka na ngai ya motane, pe nazalaki komata mbangu na canyon

boye, na kozungulukaka yango. Mbala moko, namilobeli: “Oh, nabalukaki nde wapi?” Mopepe esilaki kobanda kopepa, nzete ezalaki koningana elongo. Namilobeli: “Nabalukaki nde wapi?” Nakendeki na ngambo mosusu. Na—nayebacki ete nazalaki kokende mpenza na ngambo ya ngomba Hurricane. Kasi mbala moko natelemaki, napolaki na molunge, namilobeli: “Likambo nini oyo? Eleki ndambo ya ngonga to miniti ntuku minei na mitano, pe nazali komona esika oyo nabalukaki te.” Natombolaki miso, pe mbuli na ngai ezalaki wana. Nazalaki kaka na esika yango. Namilobeli: “Ee, nakosala ndenge nini?”

¹²⁴ Ee, nakendeki lisusu. Namilobeli: “Na mbala oyo nakokóma, nakebaki malamú te, esili.” Nazalaki kotala bisika nyonso, mwa bilembo ya mikemike nyonso, kotala malamú mpenza. Nalukaki, nalukaki, pe nalukaki. Mapata oyo ezalaki koya, nayebacki ete ekumbaki ya matandala ezalaki na nzela, londende ekitaki mpenza, pe wana nabandaki kososola. Namilobeli: “Nakokende mwa mosika,” nakendeki, nakei, nakei, nakei, nakei, nakei. Pe namilobeli: “Ee, oyo ezali likambo ya kokamwa, ezali komonana lokola namonaki esika oyo liboso.” Natalaki, pe mbuli na ngai ezalaki wana. Bomoni?

¹²⁵ Boyebi eloko nazalaki kosala? Ba-indien babengaka yango “kotambola ya kufa.” Bomoni, ozali kozunguluka kaka esika moko, ozali kobaluka, pe kobaluka. Ee, nazalaki komikanisela ete nazali mokambi ya malamú koleka ete nakoki kobunga soki moke te. Bomoni, ntina ya koyebisa ngai makambo ya zamba ezali te, nayebacki ndenge ya kobima. Bomoni?

¹²⁶ Pe nakendeki lisusu. Nalobaki: “Nakoki kosala libunga boye te.” Pe nazongaki lisusu.

¹²⁷ Namati mwa moke na esika moko na canyon, na ntango yango mopepe esilaki kobanda kopepa. Hólála, matandala bipai nyonso! Etikalaki moke ete butu ekóma. Pe nayebacki ete Meda alingaki kokufa na butu wana, na kati na zamba, alingaki koyeba ndenge ya komibatela te. Pe Billy azalaki bobele na mbula penepene minei, mbula misato, azalaki mwana moke mpenza. Pe namilobeli: “Bakosala ndenge nini?” Ee, Namataki likolo na esika moko boye, matiti ya mikemike ya petepete ezalaki wana, namilobeli: “Nakómi na esika moko ya semba, kasi nazali komona eloko moko te, etondi na londende ya makasi.” Bongo, nazalaki kobaluka kaka esika moko.

¹²⁸ Na momesano, nalingaki kozua esika moko pe natelema wana, soki nazalaki elongo na moto. Nalingaki kotelema pe kozela kino ete ekumbaki esila, mokolo moko to mibale, bongo nabima. Nalingaki kokata eteni ya mbuli na ngai...natii yango na mokongo, pe nalingaki kokende komibomba, kolia, pe nalingaki kobosana likambo yango. Kasi moto akoki kosala yango te, ntango mwasi na yo ná bebe na yo bazali kuna na zamba, bazali kokufa. Bomoni?

129 Bongo nabandaki kokanisa: “Nakosala ndenge nini?” Bongo napusanaki liboso mwa moke. Pe namilobelaki: “Zela mwa moke. Ntango nakatisaki lobwaku ya liboso oyo, mopepe ezalaki kobeta ngai na elongi, bongo na ntembe te ekoki kozala ete nautaki na ngambo oyo. Na ntembe te nautaki na ngambo oyo.” Nakotaki mpenza na kati ya zamba Géants, kasi nazali koyeba esika nazalaki te. Nalobaki: “Oh!” Nabandaki kosilika. Pe namilobeli: “Zela mwa moke, Bill, obungi te,” nazalaki koluka komikosa ngai moko. Okoki komikosa yo moko te. Te, te. Lisósoli ya kati, ekoyebisa yo ete ozali kati na libunga.

130 Oh, yo—yo ozali komeka koloba: “Oh, ngai nabikísámá, nakendeke na losambo.” Komitungisa te, zela bobele ete okóma pene na liwa, okoyeba ete ezali ndenge mosusu. Motema na yo ezali koyebisa yo. Eloko moko na kati na yo, ezali koyebisa yo ete ozali kati na libunga. Omoni? Oyebi ete soki okufi, okoki kokende kokutana na Nzambe ya bulee te. Ndenge tomonaki na ntina na Ye lobi na mpokwa, ata Banje ya bulee basengeli kozipa bilongi na bango mpo na kotelema liboso na Ye. Ndenge nini okoki kotelema wana kozanga ete Makila na Yesu Klisto ezipa yo?

131 Namilobelaki: “Oh, nakokóma.” Nakendeke lisusu. Nayaki komona ete nazalaki ntango nyonso koyoka Eloko moko. Bongo nasilikaki. Pe namilobelaki: “Sikawa, soki nasali boye, nakobulungana.” Na momesano, moto oyo abungi asalaka bongo, akobulungana na kati ya zamba. Na nsima akozua bondóki na ye, akomiboma; to akokweya na libulu moko pe akobukana lokolo, pe akotikala wana, akokufa wana. Bongo, namilobelaki: “Eloko nini nakosala?” Bongo, nabandaki lisusu kotambola.

132 Pe nazalaki ntango nyonso koyoka Eloko moko koloba: “Ngai nazali Lisungi oyo ezungaka te na ntango ya mpasi.” Nakobaki kotambola.

133 Namilobelaki: “Sikawa namoni ete nabandi kokóma mwa liboma, nazali koyoka mongongo moko ezali kolobela ngai.” Nakobaki kotambola. Pe wana, “hhu, hhu, hhu,” nazalaki kobeta piolóló, boyebi. Nazalaki komilobela: “Tala, nabungi te. Oyebi esika ozali, moninga! Likambo nini? Yo okoki kobunga te. Yo—yo ozali moto ya bokila ya solosolo, okoki kobunga te.” Nazalaki komikumisa, boyebi, ngai moko nazalaki komikosa mpo ete nabima na likambo yango.

134 Okoki kokosa yango te. Na kati mpenza *awa*, piné moko ya moke ezali kuna oyo ezali kobaluka, ezali koloba: “Moninga, obungi, pe oyebi yango. Omoni, obungi.”

135 Nakobaki kotambola. “Oh, nabungi te! Nyonso ekozala malam. Nakomona nzela na ngai ya kozonga.” Makambo ebandaki kokóma ndenge mosusu, mopepe ekómaki pene mpenza. Matandala ebandaki kokweya, matandala ya mikemike

mpenza, tobengaka yango: “mbula ya mabanga.” Nazalaki kokanisa: “Mwasi na ngai ná bebe! Nazali te...” Nazalaki komilobela: “Hólála!”

¹³⁶ Mbala moko nayoki Yango lisusu, koloba: “Nazali Lisungi oyo ezangaka te na ntango ya mpasi.” Na eleko yango, nazalaki motei ya Nsango Malamu, nazalaki koteya awa na mongombo oyo.

¹³⁷ Bongo namilobelaki: “Ee, nakosala ndenge nini?” Natelemaki, natalaki epai na epai, pe londende esilaki kokita wana. Ngai. . .Ezalaki wana. Na ntango yango, eloko ya kosala ezalaki lisusu te. Namilobelaki: “Oh, nakosala ndenge nini?” Namilobelaki: “Misie, nabongi te kozala na bomoi, namitielaki motema mingi. Nakanisaki ete nazalaki moto ya bokila, kasi nazali moto ya bokila te.”

¹³⁸ Pe, ndeko mobali, ngai natielaka Ye motema ntango nyonso. Mpo na kobeta bondóki, nalóngá mingi, yango etiami kuna. Bongo lokola molóbi ya mbisi, nayebi yango malamumu te, kasi natielaka Ye motema ntango nyonso. Mpo na kobeta bondóki, nazali mobeti ya malamumu te, kasi apesi ngai nzela ya kozua elonga monene na mokili mpo na yango. Bomoni? Kobeta mbuli, na ntaka ya verge nkama nsambo to mwambe. Nazali na bondóki moko oyo ezali kuna, oyo nabómá na yango nyama ntuku misato na mitano, kozanga ete lisasi moko ekende pembeni. Botanga yango na esika moko boye, soki bokoki kotanga. Bomoni? Ngai te, ezali nde Ye. Natieli Ye motema.

Nazalaki wana, nazalaki komilobela: “Nakosala ndenge nini? Nakosala ndenge nini?”

¹³⁹ Nakobaki. . .Ezalaki kopusana malembe, malembe, “Nazali Lisungi oyo ezangaka te na ntango ya mpasi, Lisungi oyo ezangaka te.”

¹⁴⁰ Namilobelaki: “Boye Nzambe moto azali kolobela ngai?” Nalongoli ekoti na ngai. Nazalaki na ekoti na ngai ya mobateli ya zamba, moswále ya motane elingamaki likolo na yango. Natiaki yango na nse. Nalongolaki kazaka na ngai, ezalaki na mwa mai. Pe natiaki kazaka na ngai na nse, natelemisaki bondóki na ngai pembeni na nzete. Nalobaki: “Tata na Likolo, sikawa nakómi kotambola-tambola, nazali koyoka mongongo moko ezali kolobela ngai. Ezali nde Yo?” Nalobaki: “Nkolo, nazali koyebisa Yo ya solo ete nazali moto ya bokila te. Nazali moto ya bokila te, na—nazali komona lisusu nzela na ngai te. Esengeli ete Osunga ngai. Nabongi te kozala na bomoi, kotala makambo oyo nasali, koya awa pe kokanisa ete nayebi zamba mingi koleka pe nakoki kobunga soki moke te. Nasengeli na Yo, Nkolo. Mwasi na ngai azali mwasi malamumu. Bebe na ngai, mwana na ngai ya mobali, mama na ye akufá, pe azali komeka kozala mama mpo na ye, pe nabali ye kaka mikolo oyo. Pe ye wana, ná mwana, na zamba, bango nyonso mibale bakokufa na butu

oyo. Ná mopepe oyo, ntango mosusu malili ekokita na degré zomi na nse ya zero, pe bakoyeba ndenge ya komibatela te. Bakokufa na butu oyo. Kotika bango bakufa te, e Nzambe. Zongisa ngai pembeni na bango, mpo nakoka kotala bango, ete bakufa te. Nabungi! Nabungi, e Nzambe! Na—nazali komona lisusu nzela na ngai te. Nabondeli Yo, Okosunga ngai te? Pe limbisa ngai mpo na lolenge na ngai ya komitalela! Nakoki kosala eloko moko te kozanga Yo, Ozali Mokambi na ngai. Sunga ngai, Nkolo.”

¹⁴¹ Natelemaki, pe nalobi: “Amen.” Nalokoti moswále na ngai, kazaka na ngai, nalokoti yango; nalati ekoti na ngai; nakamati bondóki na ngai. Nalobi: “Sikawa, nakokende na ngambo oyo, mpo na ngai, ezali mpenza ya malamú, na boyebi na ngai; pe nakokende semba na ngambo yango, mpo ete nazali kobaluka bobele esika moko, nayebi esika yango te. Kasi nakokende na ngambo oyo Yo okolakisa ngai, Nkolo Nzambe, Mokambi na ngai.”

¹⁴² Nabandi kotambola na ngambo *oyo*. Nalobi: “Yango oyo, esengeli ete ngai moko nayeba malamú ete yango oyo. Nakokende na ngambo *oyo*. Nakokende semba na ngambo *oyo*. Nakokende pembeni te, nakokende na ngambo *oyo*. Nayebi ete nazali na elonga. Nakokende na ngambo *oyo*.” Soki nakendeki na ngambo oyo kuna, nalingaki kokende nde na Canada. Bomoni?

¹⁴³ Na ntango yango wana, nayoki Eloko moko esimbi ngai na lipeka, loboko moko, nayokaki yango lokola loboko ya moto, nabaluki na mbugu mpenza mpo na kotala. Moto moko azalaki wana te. Namilobeli: “Likambo nini boye?” Biblia yango oyo liboso na ngai. Nzambe, Mokambi na ngai pe Mosambisi na ngai, Azali awa. Natomboli bobele miso. Pe mwa mosika, na ngambo *oyo*, londende yango elongwaki mpenza na lolenge ete nakokaki komona enóngelo oyo ezalaki likolo na ngomba Hurricane. Nazalaki kokende mpenza nde na ngambo mosusu, ntango nasalelaki makoki na ngai moko ya moto na bokila, nazalaki kokende mosika na yango, pe ngonga ebandaki mpenza kokóma mosika na mpokwa wana. Nabalukaki noki mpenza, pe nakendeki *boye*. Nalongolaki ekoti na ngai pe natombolaki maboko likolo, nalobaki: “Kamba ngai kino na suka, e Nzambe, Yo ozali Mokambi na ngai.”

¹⁴⁴ Nasimbaki nzela. Nasengelaki komata bisika ya semba pe nyonso mpo nakóma kuna, pe ngonga ezalaki bobele koleka. Na nsima butu eyindaki. Bambuli bazalaki kopumbwa liboso na ngai boye, pe nyonso. Nazalaki na likanisi mosusu te bobele ete natikala na nzela wana, namata na ngomba wana.

¹⁴⁵ Pe nayebaki ete soki nakokaki kokóma na enóngelo wana, ngai na Misie Denton. . . Nasungaki ye mpo na kotia bansinga likolo na eleko wana oyo molunge ebandaka. Totiaki bansinga ya telefone banda na ngomba Hurricane kino na nse, na ntaka penepene ya mile misato na ndambo to minei [5,5 km to 6,5

km—N.D.T.], kino na molako. Pe elekaki na bolai ya mwa nzela moko mobimba, kasi na matandala oyo ezalaki kuna, okokaki komona nzela yango te. Omoni? Ná mopepe oyo ezalaki kopepa pe nyonso, molili ezalaki makasi ná mopepe wana ya matandala, ná nyonso wana oyo ezalaki kosalema, okoki koyeba esika ozali te. Ee, eloko moko oyo nakokaki kosala, nsima na butu koyinda, nayebaki te. . . nayebaki ete nazalaki kolanda nzela moko, semba na ngambo ya ngomba. Mpamba te, nasengelaki komata ngomba, pe enóngelo ezalaki mpenza na likolo ya ngomba yango, pe nazalaki na ntaka penepene ya mile motoba [9,5 km—N.D.T.] ya kotambola liboso ete nakóma. Kanisa naino, londende epanzanaki na ntaka ya mile motoba [9,5 km], kaka lidusu moko, mpo nakoka komona yango!

¹⁴⁶ Pe na bongo, na—nasimbaki bondóki na ngai na loboko *oyo*, pe natombolaki loboko *oyo* na likolo, mpo ete natiaki nsi—nsinga likolo na banzete ezali kokita boye, bansinga ya telefone kino na mwa ndako yango, mpo ete akoka kosolola na mwasi na ye, pe akoka kobenga bato na nsinga uta kuna, na ngomba. Pe nalingaki kosalisa ye kokitisa yango na eleko wana ya mbula. Pe natiaki loboko na ngai likolo *boye*, nazalaki koloba: “E Nzambe, sala ete nasimba nsinga yango.” Natambolaki, pe loboko na ngai ezalaki koswa makasi mpenza, nalembaki, nakokaki kotombola yango na mpasi mpenza, pe esengelaki ete nakitisa yango. Nazalaki kolekisa bondóki na loboko mosusu, pe kosimba yango na oyo *mosusu*; nazalaki kozonga mwa moke nsima, mpo na koyeba malamú ete nazangi yango te, na nsima nazalaki kotombola loboko, nabandi kotambola, pe natamboli. Ngonga elekaki, molili ezalaki, mopepe ezalaki kopepa. Oh, nazalaki kosimba etape ya nzete, pe nazalaki koloba: “Yango oyo! Te, ezali yango te.” Oh, ezalaki kopesa. . . Kotika yango epesa mongongo ya mabe te.

¹⁴⁷ Nsima na mwa ntango, kaka na ntango oyo nalingaki kotika, loboko na ngai etutaki eloko moko. Hólála! Nazuamaki, ngai oyo nabungaki. Nasimbaki nsinga yango. Nabwaki bondóki na nse, nalongoli ekoti na motó, pe natelempi wana. Nalobi: “E Nzambe, esengo nini ezalaka ya kozuama, soki obungaki.” Nalobi: “Nsinga oyo, banda awa kino na suka nakotika yango te. Nakosimba nsinga oyo makasi. Yango ekokamba ngai mbala moko na esika bato oyo nalingi koleka na mokili oyo bazali, kuna. Mwasi na ngai ná bebe na ngai, bazalaki na nsomo, bayebaki esika nazalaki te, bayebaki ndenge ya kopelisa móto te, bayebaki eloko ya kosala te, pe mopepe ezalaki kopepa, bitape ya nzete ezalaki kopasuka pe kokweya.” Nalingaki kokwela likama ya kotika nsinga yango te. Nasimbaki nsinga yango, kino ete ekambaki ngai epai na bato oyo nalingaki koleka na mokili.

¹⁴⁸ Ezalaki likambo moko ya nsomo oyo nabikelaki, pe likambo moko ya nkembo ete namona lisusu nzela na ngai, kasi oyo ezali ata ndambo na yango te. Mokolo moko nabungaki

kati na masumu. Nazalaki kokende lingomba na lingomba, nazalaki koluka kozua Eloko moko. Nakendeki epai na ba-Adventiste ya septième jour, bayebisaki ngai: “Tosa mokolo na sabata, tika kolia nyama.” Nakendeki na lingomba Batiste, na Première Eglise Baptiste, alobaki: “Yo telema kaka pe yebisa bango ete ondimi ete Yesu Klisto azali Mwana na Nzambe, pe ngai nakobatisa yo, esili.” Eloko moko esalemaki te. Kasi mokolo moko, na mwa hema moko epai babombaka makala, natombolaki maboko na ngai na likolo, nasimbaki Eloko moko, to, nakoloba yango boye, Eloko moko esimbaki ngai. Ezalaki nde Nsinga ya kobikisa, Mokambi. Pe Akambi ngai kati na kobatelama kino lelo, nakolongola loboko na ngai oyo esimbi Nsinga oyo te. Natomboli maboko na ngai epai na Ye. Tika ete bindimeli ná bibongiseli basala nyonso oyo balingi kosala, ngai, nakangami na Mokambi. Mpamba te, nyonso oyo esila kosalema na mokili pe nyonso oyo ezali na Likolo, oyo ezalaki malamula te epai na ngai, ezali na suka ya Nsinga oyo. Azali kokamba ngai kati na kobatelama kino sikawa, nakotiela Ye motema mpo na ndambo na nzela oyo etikali. “Ntango Ye, Molimo Mosantu akoya, Akokamba bino pe Akotambwisa bino kati na nyonso . . .”

¹⁴⁹ Banninga na ngai, Yango nde ememi ngai ete nakóma esika nazali sikawa. Yango nde esali ete nakóma ndenge nazali. Ezali na esengo mpenza nde nazali kotalisa bino Ye. Mokambi moko oyo nayebi bobele Ye, awa na mokili pe Kuna na likolo. Azali Mokambi na ngai ntango nakendaka bokila. Azali Mokambi na ngai ntango nakendaka kolóbo. Azali Mokambi na ngai ntango nasololaka na moto. Azali Mokambi na ngai ntango nateyaka. Azali Mokambi na ngai ntango nalalaka.

¹⁵⁰ Pe ntango nakokóma liboso na liwa, Akotelema wana pembeni na ebale. Akokamba ngai ete nakatisa ngambo. “Nakobanga mabe te, mpo ete Yo ozali na ngai elongo. Mpango na Yo pe nzete na Yo, ekosembola ngai pe ekokamba ngai ete nakatisa ebale.”

Tobondela.

¹⁵¹ Tata na Likolo, nazali mpenza kozongisa matondi mpo na Mokambi, Ye Moto azali kokamba ngai. Oh, ntango mosusu, Tata, nayokaka Ye lisusu pembeni na ngai te, epesaka ngai kobanga. Nalingaka ete Azala pembeni na ngai, mpo ete nayebi ntango nini nakokóma na ebale te. Nalingaka ete Azala pembeni na ngai. Kotika ngai soki moke te, Nkolo. Nakoki koloba te, nakoki koteya te, nakoki kokende bokila na zamba te, nakoki kolóbo mbisi na libongo te, nakoki kotambwisa motuka na ngai te, soki Yo ozali te nakoki kosala eloko moko te. Ozali Mokambi na ngai. Ndenge nazali na esengo mpenza ya koyebisa eyanganelo oyo, na mpokwa ya lelo, ete Yo moto okambaki ngai kati na makambo nyonso wana, ete Yo moto omemaki ngai kuna!

¹⁵² Mokolo wana, nazalaki kokanisa; eleki mbula mingi te awa, nazalaki awa na balabala, pe mpo ete libota na ngai basalaki makambo oyo ezalaki malamumu te, moto moko te azalaki na mposa ya kosolola na ngai. Nazalaki kaka ngai moko, nazalaki na mposa ya bondeko. Bato bazalaki na ntina na ngai te. Bazalaki koloba: “Papa na ye azali molambi ya lotoko.” Pe, Nkolo, nazalaki komona ete moto moko te azalaki na mposa ya kosolola na ngai. Pe ngai, nazalaki kolinga bato. Kasi mokolo moko, ntango nasimbaki Nsinga yango! Sikawa, nazali kokanisa, Nkolo, esengeli ete nabenda nzoto pe nakende na zamba mpo na komipemisa mwa moke. Eloko nini esali yango? Ezali bomoto na ngai te, mayele na ngai ya mokanda te; nazali na yango te. Kasi ezalaki nde Yo, Nkolo. Yo, Nkolo. Opesaki ngai nzela ya kobeta nyama mpenza na esika nakanaki, Opesi ngai nzela ya kokanga mbisi ya monene, mpo Oyebaki ete ezalaki mposa na ngai. Opesi ngai batata ná bamama. Opesi ngai bandeko ya mibali ná ya basi. Opesi ngai bokolongonu ya nzoto. Opesi ngai mwasi. Opesi ngai libota. Ozali Mokambi na ngai, Nkolo. Tika ete nasimba loboko na Yo, sala ete natika yango soki moke te. Soki loboko moko elembi, nakosimba na loboko oyo mosusu. Sunga ngai, Nkolo.

¹⁵³ Pe sikawa, tika ete moto nyonso oyo azali awa, akoka kosimba kaka Nsinga yango ya kobikisa, Nkolo, Molimo Mosantu oyo Azali Bomoï na biso, liziba na biso ya Bomoï. Pe tika ete Akamba biso nyonso kuna, na Mboka wana ya esengo, epai wapi mpasi ya bomoi oyo ekosila, pe mosala na biso awa na mokili ekosila, pe na ntango yango konuna ekozala lisusu te, bato na bolembu bakozala lisusu te, ba-butu ya mpasi ekozala lisusu te, kolela pe mabondeli ekozala lisusu te, kobenga bato na etumbelo ekozala lisusu te, kasi kuna tokozala bilenge mpo na libela, mpasi pe mawa ekozala lisusu te. Lisumu ekozala lisusu te, pe tokobika na boyengebeni na Nzambe kati na bileko nyonso oyo ekoya, kati na Seko na Seko oyo ezangi suka. Kokisa yango, Tata.

¹⁵⁴ Pe sikawa, Tata, soki bato bazali awa na mpokwa ya lelo oyo naino basimba Nsinga ya kobikisa yango te, tika ete bazua Yango kaka sikawa. Pe tika ete Molimo Mosantu oyo Akambaki . . . Pe nakoki koloba, na motema mobimba, wana loboko na ngai etiami likolo na Liloba na Yo, Azalaka na elonga ntango nyonso. Ngai nasalaka mabunga mbala na mbala. Kasi Ye Azali na elonga. Tika ete Akoba kozala elongo na ngai, Nkolo. Tika ete nakoba kozala elongo na Ye. Pe tika ete bato mosusu oyo bazali awa, oyo bayebi Ye na mpokwa oyo te, basimba loboko na Ye oyo ebongwanaka te, mpo bakoka kokambama.

¹⁵⁵ Pe mokolo moko, tokokóma na ebale. Londende pe ekozala na ntongo yango. Mbu yango ekongala, Yaladene yango, mbonge ekosala, liwa ekozipa bomoi oyo ezali kati na biso. Kasi, Nzambe, ngai—ngai nakobanga te. Likambo wana nasilisa yango kala.

Nalingi bobele kolongola ekoti ya ebende, lokola mobundi, nabaluka pe natala na bolai ya nzela, mpo na komona kino wapi Nsinga yango esili kokamba ngai. Komona bazamba nyonso nasili kokatisa, bisika nyonso ya nzube, pe bisika nyonso oyo etondaki na mabanga oyo nazokaki likolo na yango, kasi nasimbaki Nsinga. Ndenge Olobaki, moyembi alobaki: “Bato mosusu bazali koleka na mai, pe bamosusu bazali koleka na mpela, bamosusu bazali koleka na komekama ya makasi, kasi bango nyonso bazali koleka na Makila.” Pe nalingi kokamata Eloko oyo, Mopanga ya kala oyo, oyo ebateli ngai na nzela, pe nazongisa Yango na ndako na Yango, nabelela: “Tata, tinda masuwa na ntongo ya lelo, nazali kozonga na ndako.” Okozala wana, Nkolo. Olakaki yango. Okoki kokweya te.

¹⁵⁶ Pambola bato nyonso oyo bazali awa sikawa. Soki bayebi ndenge ya kokanga Nsinga yango te, pe naino basimba Yango te, tika ete maboko ya bulee etombwama sikawa, maboko oyo elingi yango, maboko oyo ezali na mposa na yango, pe esimba Nsinga yango ya kobikisa oyo ekokamba bango esika mposa na mitema na bango ezali, kimia pe kosepela oyo ebongi be, kopema kati na Klisto.

¹⁵⁷ Wana togumbi mitó, maboko ezali oyo ekolinga kotombwama, pe koloba: “Tika ezala nde ngai. Simba loboko na ngai”? Oh, Nzambe apambola yo.

Ntango mawa ezali na nzela, molingami Nkolo,
zala pene na ngai,
Ntango bomoi na ngai elingi kokende;
Nakotelema na libongo ya ebale, kamba
matambe na ngai, simba loboko na ngai,
Simba loboko na ngai, molingami Nkolo,
kamba ngai kino na suka.

¹⁵⁸ Moto mosusu azali oyo akolinga kotombola loboko, mpo na koloba: “Nkolo, nalingi koyoka kosimbama ya Nsinga ya kobikisa yango na mpokwa oyo. Nalingi koyoka ete Klisto alimbisi masumu na ngai, pe nalingi kokóma ekelamu ya sika banda sikawa”? Nzambe apambola yo. Moto mosusu azali oyo akoloba: “Tika ete nasimba Yo, Nkolo. Tika ete nabungisa bomoto na ngai”? Nzambe apambola yo, ndeko mwasi. “Tika et nabungisa bomoto na ngai, pe nazua yango, Nkolo, kati na Yo.” Nzambe apambola yo. Pe Nzambe apambola yo. Ya solo. “Tika ete nabungisa bomoto na ngai, Nkolo. Tika ete nabosana.” Nzambe apambola yo, ndeko mobali. “Tika ete na . . .” Nzambe apambola yo, ndeko mwasi. “Tika bobele ete nabungisa boyebi na ngai nyonso.” Nzambe apambola yo, ndeko mwasi. Kotia motema na makambo oyo bato babongisi te. Landa Mokambi, Akokamba yo kati na solo nyonso. “Kamba ngai, Nkolo Yesu, kamba ngai.” Nzambe apambola yo, kuna na nsima. Oh, maboko ezali mingi oyo etombwami, oyo ezali na mposa ya lobiko. Sikawa, wana tozali. . .

¹⁵⁹ Etumbelo oyo, tokoki kobenga bato na etumbelo te, mpo ete bato bafandi na etumbelo bisika nyonso. Kasi Azali mpenza pembeni wana. Ntango otomboli loboko, oyebi malamau mpenza ete eloko moko esalemi na motema na yo. Yesu alobaki: “Ye oyo akoyoka Maloba na Ngai pe akondima Motindi na Ngai, azali na Bomoi ya seko.” Bosali yango na eyongi? Na bongo, esika ya kobatisa ezali awa, oyo etondi na mai. Ntango ekozala mingi mpo na kopesa libatisi. Tobondela.

¹⁶⁰ Tata na biso na Likolo, mwa Liteya moke oyo ekatani-katani na mpokwa ya lelo, eteyami na mongongo oyo ebebi, esengeli kozala ete Molimo Mosantu amimonisi na esika moko boye. Akei esika asengelaki kokende, pe bato bazali mingi, Nkolo, na mpokwa oyo, bato zomi na mitano to ntuku mibale oyo batomboli maboko na bango, ete bazali na bosenga ya Mokambi. Basosoli ete bazali komeka nde komikosa mpenza. Bazali komeka koloba: “Nazali malamau,” kasi na nse ya mitema na bango bayebi ete ezali bongo te. Pe bazali na mposa ete bayoka bozali na Yo na kati na bango, Nkolo. Bazali na mposa ya Mokambi. Bazali na mposa ete bakota na mosala. Makambo elekelaka Yo soki moke te. Bazali na mposa ete bakota na mobembo oyo. Bayebi nzela ya kokóma kuna te. Moto moko ayebi ndenge ya komema bango kuna te; Ozali bobele Yo moko. Bayei mpo na koyamba Mokambi oyo Nzambe apesi, Molimo Mosantu. Batomboli maboko na bango.

¹⁶¹ E Molimo Mosantu pe Mokambi, kita likolo na bango. Limbisa lisumu moko na moko. Limbisa masumu na bango ya nko. Kotisa bango kati na Nzoto ya Klisto na mpokwa oyo, esika bakoki koyoka lotiliki na Nzambe oyo ezali koleka na Nsinga yango, oyo ekokamba bango kino na Yaladene, pe ekokatisa bango Yaladene kino na Mboka na elaka. Tika ete balanda pe batikala kaka nsima na Liloba. Liloba elobi: “Bobongola mitema, pe na nsima bobatisama na Nkombo na Yesu Klisto.” Tika ete bameka kosala yango na lolenge mosusu te. Tika ete balanda pe batikala kaka nsima na Liloba, mpo ete Ye nde Moto akokamba. Ezali bi—bibuteli oyo tosengeli komata mpo tokoka kosimba Mokambi. Kokisa yango, Nkolo. Tika ete bakóma ya Yo. Bazali na maboko na Yo sikawa, lokola mintole, moto moko te akoki kobotola bango na loboko na Yo. Nandimi ete Okokamata bango, lokola bato oyo babikisami. Nandimi ete batomboli maboko, bango moko bakokaki kosala yango te, soki Eloko moko esololaka na bango te. Ezalaki nde Yo, Molimo Mosantu pe Mokambi.

¹⁶² Bazali komona ete ngonga ezali kobeleva nokinoki, londende ezali kokita na mokili, bindimeli minene pe—pe nyonso ezali kosangana, mangomba ezali kosala likita moko, ezali kosangana. Pe, e Nzambe, ndenge bazali komeka koloba: “Makambo nyonso oyo ezali kobima na molongo esengeli kouta nde awa, bongo na nsima ekende na Alaska.” Kokanela nyonso

oyo bazali koloba wana, ezali likambo ya sika epai na biso te, Mokambi monene alakisi biso yango na kati na nzela ya Liloba. Tozali bobele koleka na eteni wana ya Liloba.

¹⁶³ Nzambe Tata na biso, Olobeli bango na mpokwa oyo, pe napesi Yo bango sikawa, lokola mintole ya Liloba. Na Nkombo na Yesu.

¹⁶⁴ Sikawa, oyo etiami likolo na etumbelo awa, Tata, ezali miswále, ezali mpo na bato na malali, ntango mosusu bebe moko, mama moko, ndeko moko ya mwasi, ndeko moko ya mobali; ata mwa ba-epengle ya suku ekangami na kati. Pe sikawa namemi bango elongo na ngai. Nzoka nde, bateyaki biso na Biblia ete bilamba pe miswále oyo esimbaki nzoto na Polo, ezalaki kotiyama likolo na bato na malali, pe bazalaki kobika, milimo mabe ezalaki kobima kati na bato. Nzoka nde, toyebi malamumu, Nkolo, ete Polo azalaki moto, azalaki bobele moto. Kasi epakweli ya Molimo Mosantu oyo ezalaki likolo na ye nde ezalaki kopambola miswále yango, pe kondima oyo bato bazalaki na yango epai na ye ete azali ntoma na Yo. Sikawa Polo asila kolongolama kati na biso, kasi Mokambi te, Ye azali naino awa. Pe, e Nzambe, nabondeli ete Opambola miswále oyo, pe tika ete Mokambi akamba bango kino ete bamipesa mobimba.

¹⁶⁵ Bayebisaki pe biso ete ntango Yisalaele bazalaki kolanda Mokambi na bango, bakómaki kino na Yaladene, kino na (kutu) na Mbu Motane. Na kati na lotomo na bango mpenza, batelemisamaki, pe Mokambi amemaki bango kuna. Nini? Mpo na komonisa nkembo na Ye. Pe ntango elikia nyonso esilaki, na bongo Nzambe akitisaki miso na kati na Likonzi na Móto, pe ata mer morte ebangaki pe ezongaki nsima, pe nzela moko efungwamaki mpo ete Yisalaele bakatisa pe bakende na mboka na elaka.

¹⁶⁶ Na ntembe te, Nkolo, Ozali kaka Nzambe yango. Ntango mosusu bato oyo bazali Baklisto, ntango mosusu bazali mpenza na kati ya lotomo na bango, kasi bakómi na esika ya kókóso, bokono ekómisi bango na suka. Kitisa miso na kati na Makila na Yesu na mpokwa oyo, Zabolo akobanga, akozonga nsima, pe bana na Yo bakokatisa na ngambo, na elaka ya bokolongonu na nzoto. Kokisa yango, Tata. Lokola esimbi nzoto na ngai natindeli bango yango, na Nkombo na Yesu Klisto.

¹⁶⁷ Natomboli losambo oyo liboso na Yo, na kondima namemi bango mbala moko na etumbelo ya nkembo ya Nzambe, kuna na Lola. Mpamba te, nyonso oyo basengeli na yango na oyo etali bokono na bango, nyonso oyo ezali katambola malamumu te kati na bango, nyonso oyo ezali kotambola malamumu te kati na bomoi na bango, ata eloko nini, Nzambe, petola bango, kómisa bango bato na Yo. Bikisa bango, Tata. Ete nguya oyo esekwisaki Yesu kati na lilita, epesa bomoi na banzoto na bango oyo ekufaka pe ekómisa

bango bikelamu ya sika kati na Klisto. Pesa bango bokolongonu ya nzoto pe makasi ya kosalela Yo.

¹⁶⁸ Kanisa na ngai, e Nkolo. Nazali mosali na Yo. Sunga ngai, na ntango oyo nazali na bosenga ya mabondeli. Pe nasengi ete Molimo Mosantu akamba biso, pe Asalela biso, pe Atambwisa biso kino mokolo tokomona Yesu Klisto elongi na elongi, na Boyei na Ye ya nkembo, ntango tokokutana na Ye na mipepe, na Konetolama. Na Nkombo na Klisto tosengi yango. Amen.

Nalingi Ye, na . . . (Bolingi Ye?)
Mpo Alingaki ngai liboso
Asombi lobiko na ngai
Likolo na Ekulusu.

¹⁶⁹ Sikawa, soki bozali kolingana kati na bino te, bato oyo bozali komona, ndenge nini bokolinga Ye, Ye oyo bomona naino te? Sikawa, wana tozali koyemba *Nalingi Ye*, topesa na moto oyo azali pembeni mbote ya loboko ya bolingo na motema mobimba.

Nalingi Ye, . . .

[Ndeko Branham azali kopesa mbote ya loboko na bato oyo bazali pembeni na ye—N.D.E.] Nzambe apambola yo, Ndeko Neville. [Losambo bazali kokoba koyemba.]

Likolo na Ekulusu.

Sikawa, botombola maboko epai na Ye.


Nalingi Ye, nalingi Ye
Mpo Alingaki ngai liboso
Asombi lobiko na ngai
Likolo na Ekulusu.

¹⁷⁰ Nzembo kitoko, bokolinga koyoka moko? Soki nasosoli malamau, tozali na moyembisi ya nzembo moko awa oyo azali mopalanganisi ya Nsango Malamau, oyo auti na Indianapolis. Nandimi ete ayembaka na Cadle Tabernacle. Ezali bongoo? Malamau, misie. Ezali mosala na ye na Cadle Tabernacle. Bato boni bazali komikanisela na E. Howard Cadle? Hólála! Tika ete Nzambe apemisa molimo na ye ya motuya. Ndeke ya kosekisa ya mopepe, mwasi moko oyo nazalaki kolinga koyoka soki azali koyemba, koleka bato nyonso oyo nasila koyoka bango koyemba na bomoi na ngai, ezalaki nde Madame Cadle, ntango azalaki koyemba: “Liboso ete obima na ndako na yo na ntongo oyo, Okanisaki kobondela na Nkombo na Klisto Mobikisi na biso, ete Azala Nguba na yo lelo?”

¹⁷¹ Kaka awa, na ngambo ya balabala oyo kuna, na ntongo moko, na kati na mwa ndako ya moke, natelemaki, nazalaki komilengela mpo napelisa móto. Lituka ezalaki kopela te. Nazalaki komeka kopelisa yango, pe mopepe eyaki, epepaki pe ebwakelaki ngai yango na elongi. Pe malili ezalaki, etikalaki moke nakangama na malili. Glas ezalaki na nse, na bisika nyonso, pe ngai nazalaki makolo ngulu; nazalaki komeka

kopelisa mwa lituka wana ya ebende ya pembe, na mwa tiyo na yango ya fulu. Pe nautaki. . . Ngai na Meda toutaki kobalana, kala te. Pe nazalaki komeka, nkoni ya kala yango ezalaki na mai pe ezalaki kopela te, pe nafandaki wana, namilobelaki: “Hólála! Nakomeka lisusu.” Esengelaki ete nakende na mosala, pe nazalaki kotia mopepe na mwa lituka yango ndenge wana. Nasembolaki loboko pe nafungolaki radio, pe ebandaki koyemba: “Liboso ete obima na ndako na ntongo oyo, boye okanisaki kobondela,” nafukami na mabele mbala moko, “na Nkombo na Klisto Mobikisi na biso, ete Azala Nguba na yo lelo?” Oh, ndenge nalingaka koyoka mwasi wana!

¹⁷² Na ntango moko, ntango nakokatisa na ngambo ya ebale, nandimi ete nakoyoka Madame Cadle, afandi kuna. Boyebi, banda kala, namipesaki elaka. Na ebale, na ngambo oyo, Nzete moko ya mobesu ezalaka ntango nyonso, boyebi, Nzete na Bomoi; pe na ebale, na ngambo oyo mosusu, korále moko ya Banje ezali, oyo bayembaka moi pe butu, mpo ete butu ezali kuna te, bayembaka moi mobimba, bomoni. Nakomilukela esika moko, nakofanda pe nakoyoka yango. Nandimi ete nakoyoka Madame Cadle azali koyemba kuna.

¹⁷³ Nzambe apambola ndeko na biso ya mobali. Nabosani nkombo na ye. Nkombo yango nde nani, ndeko? [Ndeko mobali yango alobi: “Ned Woolman.”—N.D.E.] Ndeko Ned Woolman akoyembela bino sikawa. Ndeko Woolman, tozali na esengo ya kozala na yo awa na mpokwa oyo. [Ndeko Woolman azali koyemba *Esika na Bulee Ya Motema Na Ngai.*—N.D.E.] 

MOKAMBI LIN62-1014E
(A Guide)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na mpokwa, mokolo mwa 14, sanza ya zomi, na mobu 1962, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2014 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiama na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org